

## **VASEGA LAITI AUIVI 2021**

### **MANATU AOAQ : IA ILOA LE ALII I TAIMI UMA**

<b>IANUARI</b>	<b>O LE ATUA SAILI MAI</b>		
31	<b>ASO SA TUPULAGA</b>		
	Aperaamo ma agelu	-----	Kenese 18:1 - 9
<b>FEPUARI</b>	<b>OLA AUAUNA</b>		
7	O le tau i o le auauna lelei	-----	Mataio 25:14 - 30
14	E leaga le paie	-----	Faataoto 6: 6 - 11
21	Ua mananao Isaraelu i se Tupu	-----	1 Samuelu 8: 1 - 18
28	Mika ma le tagata Sa Levi	-----	Faamasino 17 : 7 - 13
<b>MATI</b>	<b>OLA SAILI I LE ATUA</b>		
7	Asiasiga i le nuu o Kanana	-----	Numera 13: 17 - 25
14	Ua saili Nikotemo ia Iesu	-----	Ioane 3:1 - 7
21	Valaauina o Ieremia	-----	Ieremia 1: 1 - 10
28	<b>(Aso Sa Laupama)</b>		
	Ua tietie Iesu i le asini	-----	Mataio 21:1 - 11
<b>APERILA</b>	<b>FA'AILOGA O LE TALA LELEI</b>		
4	<b>(Aso Sa Toetu)</b>		
	Tala Lelei faaauau	-----	Mareko 16: 1 - 8
11	Ua masae le lagi	-----	Mareko 1:9-13
18	Lefulefu mai le umu	-----	Esoto 9:8 -12
25	O le Kikaiona	-----	Iona 4: 5 - 11
<b>ME</b>	<b>TIUTE FAA-TINĀ</b>		
2	O Pu'a ma Sepela	-----	Esoto 1:15-22
9	<b>(Aso Sa Tinā)</b>		
	O ai ea lo'u Tina?	-----	Mataio 12:46 - 50
16	<b>FONO TELE</b>		
23	O le tatalo a Hana	-----	1 Samuelu 1:1 - 18
30	O Raava	-----	Iosua 2:1 - 7
<b>IUNI</b>	<b>POTO MAI LE ATUA</b>		
6	Tagata poto ma le tagata valea	-----	Mataio 7:24 - 27
13	O ofu tau	-----	1 Samuelu 17:38 - 40

20	E manuia le tagata poto	-----	Faataoto 3:13 -20
27	Solomona le poto	-----	1 Tupu 3: 5 - 15
<b>IULAI</b>	<b>IA MATAALA</b>		
4	Ua mimita Esekia	-----	Isaia 39:1-8
11	Au Soo Faatuatua Itiiti	-----	Mataio 8:23 - 27
18	O Taupou Mataala	-----	Mataio 25: 1 - 13
25	Aua le tusitusilima	-----	Mataio 7:1 - 6
<b>AOKUSO</b>	<b>FAALOGO MA USITAI</b>		
1	Ua usitai le uii	-----	Luka 15:17 - 20
8	<b>(Aso Sa Tamā)</b>		
	Aua le femisaai	-----	Kenese 13:1-9
15	Ua le usitai Atamu i le Atua	-----	Kenese 3:17 - 18
22	Filifilia Kitiona	-----	Faamasino 6:11 - 18
29	Ua usitai Noa ile Atua	-----	Kenese 6:13 -22
<b>SETEMA</b>	<b>E ALOFA IESU I TAMAITI</b>		
5	<b>(Aso Sa Tala Lelei)</b>		
	Galulue Faatasi	-----	Roma 12:3 -8
12	O le ana i Enokati	-----	1 Samuelu 24:1 -7
19	O le Tovine	-----	Luka 20:9 - 16
26	O le Tama o Samuelu	-----	1 Samuelu 3:1 - 10
<b>OKETOPA</b>	<b>E ALOFA IESU I TAMAITI</b>		
3	<i>Tapenaga Lotu Tamaiti</i>		
10	<i>Aso Sa Tamaiti</i>		
17	<i>Malologa Lotu Tamaiti</i>		
24	Ua pupula le tauaso	-----	Luka 18:35 - 43
31	E alofa Iesu i Tamaiti	-----	Mareko 10:13 - 16
<b>NOVEMA</b>	<b>E OFOFOGIA LE ATUA</b>		
7	O le asini	-----	Numera 22;21 - 28
14	“O oe o le Keriso”	-----	Mareko 8:27-30
21	O le asiosio	-----	11 Tupu 2:9 - 14
28	Vavega na faia e Elisaia	-----	11 Tupu 4:1 - 7
<b>TESEMA:</b>	<b>IESU E FAAOLA MAI</b>		
5	Ua faafogaina e le Atua le tatalo a Sakaria-----		Luka 1: 13 - 17
12	O le fale manu	-----	Luka 2 :1 - 7

## MANATU TAIALA O IANUARI: O LE ATUA SAILI MAI

O le Atua lava ia o le Atua e saili mai i lana tagata na fai. E le manao le Atua e ola pea lana tagata i le agasala. Faapei ona fetalai o lo tatou Alii Faaola o Iesu Keriso, *Ou te lei sau mo e malolo, na ou sau mo e mama'i...* O lo o atagia ai le agaga saili mai o le Atua i le tagata. O se manatu lea o le a tata'i ai manatu o mataupu o lenei masina.

**ASO SA:** 31 Ianuari 2021

**MATAUPU:** **APERAAO MA AGELU**

**SINI:** Ia malamalama le vasega, o le ola tapenapena mo le Atua, e tapena i so'o se taimi.

**TUSI FAITAU:** Kenese 18: 1 – 9

### FESOASOANI MO FAIAOGA:

O le mataupu lenei sa tatou faitauina, o le feiloaiga a Aperaaamo ma agelu. E pei o i o lo'o atagia mai ai se talatalanoaga a le Atua ma Aperaaamo e auala mai i agelu. O se talanoaga ua iloa ai le taliaina ma le agaga tali mālō o le toeaina o Aperaaamo. Fai mai le tala, e le'i faatali le toeaina o Aperaaamo, e ui o lea fa'atoā ia vaai ma feiloa'i i nei tagata ae na te le'i iloa muamua. Ae ui i lea, o le agaga tali mālō lelei na ia faa-ulufaleina ai nei tagata e toatolu i totonu o lona fale ie.

O le taliaina e Aperaaamo o agelu i lona fale, o lona taliaina foi lenā o le Atua. O le tala sa faitauina, fai mai na ona tepa a'e lava o Aperaaamo ma iloa atu tagata e toatolu. O le tagata ua leva ona ia faatali i le Atua. O le ata vaaia foi lenā o le Atua e saili mai i le tagata; e faapena foi i le tagata e saili ma faatalitali i so'o se taimi mo le Atua.

Tamaiti lea o le a amata a'oa'oga o lenei tausaga, ua e sauni ea e talia Iesu e ulufale i lou loto i so'o se taimi? O lau tapenaga amata o lenei tausaga, e te tapenapena i so'o se taimi. E te tapena i taimi uma ma aso uma, auā e te leiloa le taimi e ulufale ai Iesu i lou loto. E te le iloa le taimi e saili atu ai le Atua ia te oe; ae lelei le saili atu o le Atua, a'o lenā ua e lava tapena, tapena lou loto, tapena lou mafaufau e faapenā ona faigofie ona ulufale Iesu i totonu. Ae a tatou fa'atamala ma lē ola tapenapena, ona tatou le maua lea o faamanuiaga mai le Atua.

Tatou vaavaai foi ia Aperaaamo, o le tagata ua leva ona faatali i le Atua. O le tagata ua leva ona sauni e tali le valaau a le Atua. Auā e i ai le taimi e saili mai ai le Atua ia te oe, a'o lena ua e lava tapena. Le fanau e, o lau tapenapenaga amata o lenei tausaga e te tapena faatasi ma le Atua. Tatou aveia Iesu e fai ma o tatou taiala, o Ia e muamua ma mulimuli i luma o lau savaliga amata o lenei tausaga, ona manuia ai lea o lou faamoemoe.

### Uiga o Upu:

- i) Aluna o Mamere : aluna o lo'o faatusa i le laau tele maualuga o loo faapaolo ai le fale ie o Aperaaamo ma Sara, fai mai le tala sa taotooto ai le toeaina o Aperaaamo. A o Mamere o le igoa o le nofoaga, poo le nuu e i totonu o le itumalo o Heperona.
- ii) Fa'afetaia'i : faafetaui poo le faafeiloa'i

- iii) Mulumulu : fufulu, solo, faataele po’o le famamā
- iv) Sea o falaoa : o le fua lena sa tao ai falaoa i ia ona po i taimi o Aperamo (*measure used to bake breads*). E le gata i lea o le auala sa fa’aaogaina e tao ai falaoa, fai mai e 2 kalone ma le afa sa fa’aaogaina, e tusa o le 20  $\frac{1}{4}$  sa fa’aaogaina e tao ai falaoa.
- v) Potoi areto : e foliga o se (*cupcake*) o le falaoa ua uma ona palu e faa foliga pei o se *cupcake*, ona tuu lea i totonu o le apa, ma tuu i le ogaumu e tao.
- vi) Mu’amu’a : o se moemoe fou ma vaivai, lea e faatusa i ai le tamai povi fou lelei
- vii) Suasusu to’a : (*butter*) sa faaaogaina i mea taumafa i le taimi o le ‘aiga a Aperamo ma agelu
- viii) Gaosia : sau mai le upu gaosi, o lona uiga o le galueaiina, faia poo le faatino

### **GALUEGA FAATINO: FA’ATALANOAGA**

Fai se faatalatalanoaga poo se faasoa ma le vasega (sharing), pule lava lau susuga i le faiaoga i ni fesili ta’iala, e fesiligia ai le fanau, pe a o’o ina tapena mo le aoga; o a mea e manaomia pe a o’o ina tapena ai le tama ma le teine i le a’e ai o aoga?

### **PESE: E TOATOLU AGELU NA O**

E toatolu agelu na o  
 Na iloa e Aperamo  
 Ua tamoe e ifo toele  
 Ua ulufale i lona fale .....(*fati: E toatolu tupu na o..pese kirisimasi*)

### **A’OA’OGA:**

1. E taua le ola tapenapena i so’o se taimi
2. A tatou saili i le Atua, e faapena foi ona saili mai le Atua ia i tatou.
3. Ia agalelei i so’o se tagata.

# E To'atolu Agelu

MAK

J. H. Hopkins

First system of musical notation (measures 1-6). The key signature is one sharp (F#) and the time signature is 3/8. The melody is written in the treble clef, and the accompaniment is in the bass clef. The lyrics are: E toa tolu a ge lu na o Na i loa e

Second system of musical notation (measures 7-11). The key signature is one sharp (F#) and the time signature is 3/8. The melody is written in the treble clef, and the accompaniment is in the bass clef. The lyrics are: A pe ra amo U a ta moe ma i fo to

Third system of musical notation (measures 12-15). The key signature is one sharp (F#) and the time signature is 3/8. The melody is written in the treble clef, and the accompaniment is in the bass clef. The lyrics are: e le Ua u lu fale i...lona fale

# APERAAMO MA AGELU



\*\*\*\*\*

## **MANATU TAIALA O FEPUARI: OLA AUAUNA**

O le ola auauna e tutusa lava ma le ola galue. O le faamoemoe lava lea o soo se tagata soifua na tuuina mai ai e le Atua i le lalolagi. Ua tatou omai e tatou te galulue e le gata o le tautuaina o o tatou aiga, nuu, ae faapea foi i le ola tautua i le Atua ma le Tala Lelei.

**ASO SA:** 7 Fepuari 2021

**MATAUPU:** **O LE TAU I O LE AUAUNA LELEI**

**SINI:** Ia a’oa’oina le vasega ina ia malamalama i le taua o le fa’aaoga tatau o taleni ma meaalofo na foaiina mai e le Atua.

**TUSI FAITAU:** Mataio 25: 14 – 30 (Mo Faiaoga)  
Mataio 25: 20 – 24 (Mo le Vasega)

## **FESOASOANI MO FAIAOGA:**

O le tala leni i le fa’ataoto na faamatalaina e Iesu i ona so’o. O le tala ua faatusa ai e Iesu le malo o le Atua ma le taliaina e le tagata o lona malo. E le gata i lea, o le tau i e maua e le tagata pe a ia fa’aaogaina ma le tatau meaalofo ua ia tuuina mai.

O leni tala, ua faatatauina i le faaaogaina tatau o taleni poo meaalofo na foaiina mai e le Atua. O le tala i le va o le matai ma ana auauna e toatolu, na ia tuuina atu i ai taleni e lima i le tasi, taleni e lua i le tasi, ia ma le tasi i le isi.

O le tufatufaina e le matai o taleni nei i ana auauna, o lona manatu, ia faaaoga tatau nei taleni. Ia galueaiina ina ia maua mai ai se faasiliga. E faapefea la ona galueaiina le taleni? O le na i ai taleni e lima ua ia galueaiina ua toe maua ai taleni faaopoopo e lima, e faapena foi i le na i ai taleni e lua. Peitai, o le auauna lea na i ai le taleni e tasi, ua ia tanu ae na te lei galueaiina le taleni mo se isi taleni faaopoopo. Ua le gata ua na tanu le taleni, a o le faailoga o le tagata e paie ma augata, ua le faaaogaina le taimi lelei e galueaiina ai le taleni. A’o isi auauna ua laua maua taleni faaopoopo ona ua la faaaogaina tatau ina ia maua ai se isi taleni faaopoopo. O le faailoga o le tagata e onosa’i ma faamaoni ae le faalogologotiga.

Tamaiti, a oo ina tuuina mai e o tatou matua se galuega tatou te faatinoina, ia o tatou faia ma le loto maulalo, ma le faamaoni. Faaaoga tatau le mafaufau lelei mai le Atua e te faatinoina ai se galuega. Fa’amaoni i soo se galuega ua tuuina mai ia i tatou e faia, tusa pe laitiiti ia pe tele foi. O lo tatou ola, e tautua ma auauna i le Atua i so’o se ala e faaaoga tatau mo lana feau ma lana Talalelei.

## **Uiga o Upu:**

i) Taleni – o le tupe Eleni, agavaa, tomai po’o le iloa

## **GALUEGA FAATINO: TUSITUSIGA**

Tapena e lau susuga le faiaoga ni cardboards, po'o ni pepa A4 ona tufa lea i tamaiti tofu le tamaitiiti ma le teineitiiti ma le pepa. O le galuega faatino o le a faia, tusi lou igoa i luga o le pepa, tusi ma lau taleni e te mana'o e ausia pe a e matua. A mae'a, tusi i lalo ma le mafuaaga ua filifilia ai lena taleni; ona faasolosolo lea i luga e to laulau mai a latou galuega i luma o le vasega. Manatua, fai i tamaiti e 'aua nei tia'iina le pepa ae vaai se wall o le fale e fa'apipi'i ai luga.

**PESE:** E lima taleni na aumai ou te galue ai

Lima Taleni na tuuina mai, ou te galueaina  
 Manao le matai e maua ai o se faasiliga...Ioe e moni  
 Sa ou galue ma le faamaoni, ina ia toe mauaina o se tau'i.  
 Numera 5, ina ulufale maia,,,,

Lua, lua taleni na tuuina mai, ou te galueaina  
 Manao le matai e maua ai o se faasiliga...Ioe e moni  
 Sa ou galue ma le faamaoni, ina ia toe mauaina o se tau'i.  
 Numera 2, ina ulufale maia,,,,

Tasi, tasi taleni na tuuina mai, ou te galueaina  
 Manao le matai e maua ai o se faasiliga...Ioe e moni  
 Sa ou galue le faamaoni, ina ia ou le maua o se tau'i.  
 Numera 1, alu ia i le afi,,,,

## **A'OA'OGA:**

1. Fa'aaoga tatau taleni ua aumai e le Atua ia i tatou.
2. Fa'amaoni i mea iti e faamanuiaina ai oe.
3. Ia auauna i le Atua i lou loto ma le agaga atoa.



# UA TUUINA E LE MATAI TALENI I ANA AUAUNA



\*\*\*\*\*

**ASO SA:** 14 Fepuari 2021

**MATAUPU:** **E LEAGA LE PAIË**

**SINI:** Ia malamalama le vasega e le i'u i le manuia se tamaitiiti e ola paie.

**TUSI FAITAU:** Faataoto 6: 6 – 11

### **FESOASOANI MO FAIAOGA:**

O le Tusi lenei o Faataoto o le Tusi o le Poto, poo le Tusi na tusia e le tupu o Solomona. O le tusi o lo o faamaumuina ai a'oa'oga eseese e uiga i le poto. O le vaega la lenei o le Tusi sa tatou faitauina nei, ua a'oa'o mai ai le poto, i le tagata paie ina ia alu e matamata i le gaioi a le loi.

O le loi, tasi lenei o iniseti e fai ma masani, a oo i aso la ona alu loa lea o lana sailiga meaai. E fiafia lava le iniseti lenei e saili ana meaai i taimi e lelei ai le tau. O aso uma ma taimi uma e galue lava le iniseti lenei, sei vagana ai lava la, pe a oo loa i aso leaga po o aso timuga, ona malolo lelei lea o le loi i lona fale poo le nofoaga oloo nofo ai ma faasolo ana meaai. E pei o le natura na o le loi po o le olaga o aso uma, o loo faatusa ai e le poto o Solomona le tagata e ola paie ma ola nofonono. O le tagata e ola ile faatonuga, e le faaoga tatau le mafaufau lelei. Lea la e fai mai le poto, le paie e, ina alu ia e matamata i le gaioi a le loi. Fai mai e leai sona ta'ita'i e galue lava o ia e aunoa ma se faatonuga.

E faapena i tatou le fanau ma le olaga lea oloo tatou i ai; tele o taimi tatou te faalagolago i taimi uma i le faatonuga mai o tatou matua, ona o lea o tatou e fai se feau. Ae taua foi lo tatou faalagolago i le faatonuga, aua o tatou matua e aumaia le faatonuga ona tatou usita'i lea. A o le faamalosi a le poto mo i tatou i lenei taeao, 'aua tatou fiu gofie, 'aua le paie e fai feau a matua. E le gata i lea, e taua le faaoga lelei o tatou mafaufau lelei e faatinoina ai feau ma galuega ua faatonuina ai i tatou.

Ae 'aua foi lo tatou faalagolago tele i o tatou matua, auã o le tele foi na o i tatou ile taimi nei, seiloga lava e valaau mai o tatou matua i se galuega e fai, ona fa'atoã ò lea o tatou e fai. E taua lou faamaoni i taimi uma, 'aua le paie e fai galuega e faatonuina ai i tatou. E taua le faaoga lelei o tatou mafaufau lelei na aumai e le Atua, e faatino ai galuega. A tatou o i le aoga, a tuu mai e le faiaoga se galuega e fai, ia e faia ma le faamaoni, ae 'aua le faia augatã auã pei ona fai mai le tatou mataupu o lenei taeao, e leaga le paie.

Tamaiti, aisea e leaga ai le paie? E leaga, auã a le faamaoni tatou i le aoga, e le maua se mea lelei, ma se mea aogã. 'Aua tatou te paie e fai meaaoga ma fai galuega i totonu o tatou aiga; auã e leaga le paie.

### **GALUEGA FAATINO: TALIGA FESILI**

1. Aisea e alu ai le tagata paie e vaavaai i le loi?

Tali: Ina ia iloa ai le le malolo ma le toaga o le loi e saili ana meaai

2. O a aso e galue ai le loi?

Tali: O aso lagi lelei

3. Ao a foi aso e malolo ai?  
Tali: O aso timuga ma louloua

**PESE: E LEAGA LE PAIE**

Galue ma faamaoni, galue ma faamaoni  
Fiafia ma olioli e te maua ai le tau  
E aumai e Iesu, e aumai e Iesu,  
Pe afai tatou te galulue ma faamaoni

Le tama paie, le teine paie  
Tu ia i luga e vaavaai i le loi  
E galue i aso lã, ae leai se lelavã  
Ae mālōlō i aso loulouã..... *(fati: Faalogo ma usitai e leai se isi ala)*

**A'OA'OGA:**

1. 'Aua le paie e fai feau a matua.
2. E leai se mea e maua ma se filemu.
3. 'Aua le fiu gofie.

# E Leaga le Paie

Traditional Sunday School Song

$\text{♩} = 80$

Ga lue mafa'a ma o ni Galue mafa'a ma o ni Fia fia ma o li o

4

li e temaua..aile ta li Naau maie le su Na au maie Iesu Pe afai tatou tega lu lue mafaama

7

o ni

\*\*\*\*\*

**ASO SA:** 21 Fepuari 2021

**MATAUPU:** **UA MANANA’O ISARAELU I SE TUPU**

**SINI:** Ia malamalama le vasega, o le mananao o Israelu i se Tupu e le’o le finagalo lea o le Atua

**TUSI FAITAU:** 1 Samuelu 8:1- 18 (Mo le faiaoga)  
1 Samuelu 8:1 – 8 (Mo le vasega)

### **FESOASOANI MO FAIAOGA:**

O le tala lea sa o tatou faitauina i leni taeao, o se tala ua atagia mai ai le ola mana’ona’o o le nuu o Israelu. O se mana’o e le’i masani muamua ai le nuu o le Atua. Manatua foi tatou le fanau, e tasi lava le Tupu, ua na o le Atua lava e toatasi; o Ia o le Tupu Silisili e ifo i ai tagata uma. Peitai o lea ua manana’o Israelu i se latou tupu, ina ua le savavali le fanau a Samuelu e tusa o tulafono ma taiala na faasino ai e le Atua mo i latou. Tamaiti o Samuelu o ia o le faamasino ua toeaina. Na filifilia lana fanau o Ioelu ma Avia e fai ma faamasino o le nuu o le Atua, peita’i e le’i usitaia e le fanau a Samuelu tulafono e tusa ma lo laua valaauina.

O le ala lea o le naunau o le nuu o Israelu e saili so latou tupu, aua ua le faamaoni Ioelu ma Avia i lo laua valaauina. Ua tupu a’e ai le manatu o Israelu, e sili ai loa le saili o so latou tupu.

E foliga mai i le vaaiga i le tala, ua amata ona aafia lagona o tagata Israelu ma ua tosina o latou loto i tu ma aganuu a isi atunuu; e pei lava foi ona fai a latou tupu e faamasinoina i latou. Lea la ua o’o mai foi ia Israelu lea mana’o i le fia faia o so latou tupu e pei o isi nuu.

O se manaoga na matua’i le fiafia ai le Atua i manatu o tagata Israelu. E ui i lea sa faataunu’uina lava le mana’o o le nuu. E mai fea nei manatu o tagata o le nuu o le Atua? Ua manana’o foi i latou e pei o Filisitia e i ai lo latou tupu e umia le pule ma ta’ita’iina le nuu. E faalologo uma tagata i le tupu, o le tupu na te faamasinoina le nuu ma faia faaiuga fai i totonu o le nuu.

Peitai o le ituaiga mafaufauga lea na tupu a’e i tagata Israelu, ina ua le savavali le fanau a Samuelu i ona ala e ala i le taitaiina o le nuu; lea la ua latou manana’o i so latou tupu e na te faamasinoina le nuu. Ae ui lava i le le fiafia o le Atua i lona nuu o Israelu ae sa faia lava, ua taunuu upu a le perofeta, “E alalaga outou i lea aso ona o lo outou tupu na outou filifilia mo outou a e e faafofoga mai le Alii ia te outou i lea aso.”

O le ata vaaia o le faanoanoa o le Atua ma ua liliu ese ona fofoga mai lona nuu na filifilia. Ua latou manana’o i so latou tupu ae ua galo le Atua o le Tupu o tagata uma. Mafua mai ona ua tosina o latou loto i faiga a isi nuu e pei o Aikupito ae ua le faamuamua ai le Atua o le sa o latou mua’i osi feagaiga.

Tatou le fanau i leni taeao, aua nei tosina gofie o tatou loto i nisi mea e le aoga i ai tatou ma lo tatou ola tuputupu ae. Aua tatou te mana’ona’o fua ma ma taumafai e faataitai mea o lo o faia e tagata matutua. Ia tatou ola fiafia i mea ua aumaia e o tatou matua mo i tatou. Ia manuia tele outou le fanau.

**Uiga o Upu:**

- i) Toolive – o le togā olive, poo le faatoaga olive
- ii) Suatia – e sau mai le upu sua, poo le faamama ese.
- iii) Kariota – o le taavale solofanua, e fauina i laupapa ma u’amea ma auro. E masani lava na o tagata maualuluga poo tupu e tietie ai.
- iv) Ta’utino – Talanoa, faasoa po’o le ta’u le mea sa’o
- v) Fa’api’opi’o – le sa’o ona fai
- vi) Lafoa’iina – faagalologo, le manatua, le amanaia, tia’i

**GALUEGA FAATINO: PASO**

Saili mai upu nei i totonu o le paso?

(Peresepa, Samuelu, Rama, kariota, tupu, tovine, usita’i, pule, mana)

P	E	R	E	S	E	P	A	O	R
U	O	A	K	A	R	I	O	T	A
L	A	N	A	M	Z	T	N	J	M
E	T	W	H	U	J	U	W	X	A
E	R	T	O	E	S	P	L	K	U
O	Q	A	P	L	P	U	W	P	S
L	T	I	L	U	L	O	T	A	I
U	S	I	T	A	I	L	O	A	N
M	I	L	I	E	N	I	V	O	T

**PESE: O IESU LE TUPU**

O Iesu Keriso o le Tupu  
 O le Tupu o tagata uma  
 E leai se tasi tupu e tutusa ma Ia ×2

**Tali:**


Ia tatou alalaga ma vivii i lona Suafa  
 Aua o Ia o le Tupu i le lalolagi uma lava  
 O Iesu o le Tupu sili e malosi toe mata’utia  
 E leai se tasi tupu e tutusa ma Ia.....(*fati: O le Atua e paia / My God is so big*)

## **A'OA'OGA**

1. 'Aua nei tosina gofie o tatou loto i fa'aosoosoga o lenei lalolagi
2. Tumau i a'oa'oga ua a'oa'oina ai i tatou
3. Ia manatua o Iesu le Tupu o Tupu



**UA MANANA'O ISRAELU IA SAMUELU E SAILI SO LATOU TUPU**



\*\*\*\*\*



**ASO SA:** 28 Fepuari 2021

**MATAUPU:** MIKA MA LE TAGATA SA LEVI

**SINI:** Ia malamalama le vasega o le ofo atu o lau fesoasoani alofa i le isi ou uso a tagata, o le faatinoina foi lena o lou alofa i le Atua.

**TUSI FAITAU:** Faamasino 17: 7 – 13

### FESOASOANI MO FAIAOGA

O le tatou tala lea na faitauina o le fesoasoani alofa a Mika i le tagata Sã Levī. O Mika pei ona taua i le tala, o le uiga o lona igoa “E leai se tasi e tutusa ma le Atua”. O lana auunaga faatino ua ia alofa atu i le tagata Sã Levī. Manatua foi tatou le fanau, o tagata Sã Levī e pei ona taua i le Tusi Paia, e o mai mai le ituaiga o Levi o le atalii o Iakopo.

O le tagata lenei e leai sona fanua, leai sona fale ae sa nofo i le fanua o le isi ituaiga o Iuta i Peteleema. E i ai le manatu o nisi, ua mafua ona alu ese le tagata Sã Levī lenei mai Peteleema ona ua leai se tupe, poo ua leai foi se galuega e galue ai e atina’e ai lona aiga. Lea la ua sau le tagata Sã Levī ma saili sona nofoaga e nofo ai ma atina’e ai lona aiga, ae fetau ai ma Mika. O le mea e uiga ese ai lenei tala o le galuega fesoasoani a Mika i lenei tagata Sã Levī. Ua le gata ua ia ofoina atu ai lona fale e nofo ai, ae ua ia foa’i atu fo’i tupe ma lavalava.

A o le mea pito sili ona faafiafiaina ai Mika, o le avea lea o le Sã Levī e fai ma ana ositaulaga, e le ala mai ai manuia o le Atua ia te ia ma lona aiga. Silafia e Mika, o le ofo atu o le auunaga i le isi tagata, o le auala foi lea e maua ai manuia mai le Atua.

Tamaiti, o lau fesoasoani i so’o se isi lava, poo lau uo, o lou uso, o lou tuafafine, o lou tuagane, o ou matua poo ai lava; ia po’o se tagata ese e te lua le aiga. O le faatinoina foi lena o lou alofa i le Atua. O le ata vaaia lenã o le ola auunaga, o le galue pea e fesoasoani atu i so’o se tagata. O le faailoga lena o le alofa o le Atua e alofa ai i so’o se isi. O le alofa o le Atua e le faailogaina se tagata. Ia manuia tele outou le fanau i lenei taeao. Famanuia le Atua.

**GALUEGA FAATINO:** Faatumu avanoa i upu nei

Mika, Levī, Peteleema, Iuta, aumau, nonofo, tamã, faitaulaga, avatu, tupe, sefulu, tausaga, ofu,

Ua fesili atu 1 \_\_\_\_\_ ia te ia, Na ifea oe? Ua tali mai o ia ia te ia, O a’u le sa 2 \_\_\_\_\_, mai 3 \_\_\_\_\_ o 4 \_\_\_\_\_; ou te alu e soona 5 \_\_\_\_\_ i se mea ou te maua. Ona fai atu lea o Mika ia te ia, Ta te 6 \_\_\_\_\_ ma a’u ia fai oe mo’u 7 \_\_\_\_\_ ma’u 8 \_\_\_\_\_; a o a’u, ou te avatu ia te oe tupe e 9 \_\_\_\_\_ i lea tausaga ma lea 10 \_\_\_\_\_, ma ou 11 \_\_\_\_\_, ma au mea e ‘ai. Ona alu ane ai lea o le Sa Levī.

**TALI:** 1-Mika, 2-Levi, 3-Peteleema, 4-Iuta, 5-aumau,

6-nonofo, 7-tama, 8-faitaulaga, 9-sefulu, 10-tausaga, 11-ofu.

**PESE: E ALOFA LE ATUA IA I TATOU UMA**

E alofa le Atua ia i tatou uma, i tatou uma, i tatou uma  
E alofa le Atua ia i tatou uma, alofa ia i tatou .uma  
Alofa ia Tamã, alofa ia Tinã, alofa i lou uso ma lou tuafafine laitiiti  
Alofa ia te oe ma le tagata ese, alofa ia i tatou uma.

**A'OA'OGA:**

1. Ia loto fesoasoani i le ua mana'omia le fesoasoani
2. Alofa i so'o se tagata.
3. Auauna i le Atua e te manuia ai.

\*\*\*\*\*

**O MIKA MA LE SA LEVI**



\*\*\*\*\*

## **MANATU TAIALA O MATI : OLA SAILI I LE ATUA**

E faapei ona saili mai o le Atua, e tatau ai foi ona tatou ola saili i le Atua. O le ola saili o tatou i le Atua, o le saili lava lea i le ola manuia. E fiafia le Atua i le tamaitiiti e saili ia Iesu, e na te fesoasoani ma aumaia manuia i ai tatou.

**ASO SA:** 7 Mati 2021

**MATAUPU:** **ASIASIGA I LE NUU O KANANA**

**SINI:** Ia malamalama le vasega, o Isaraelu o le nuu na faamanuia i ai le Atua

**TUSI FAITAU:** Numera 13: 17 -25

### **FESOASOANI MO FAIAOGA**

E le taumate le tele o vavega ofoofogia na faia e le Atua mo lona nuu o Isaraelu. O le o ese mai Aikupito i le mea sa nonofo pologa ai, o le vaeluaina o le sami ulaula ae savavali mai ai ona tagata i le eleele mātūtū. O vavega tetele na, na iloa ai le mata'utia o le Atua. Peitai, o lea ua sauni Isaraelu e ulufale i le nuu folafolaina a'o lea lava e masalosalo lava loto o tagata, ma e foliga mai e iai lava le fefefe ma le le mautonu.

O Kanana o le nuu na folafolaina e le Atua, e nonofo ai Isaraelu pe a mae'a le latou malaga faaumiumi i totonu o le vao. Lea la ua latalata o le a ulufale atu i Kanana, ua i ai le manatu o Mose se'i alu le asiasiga i totonu o Kanana pe a mai foliga o totonu o le nu'u. Pe a mai lona laueleele, o laau, ma ni mea o lo'o ola ai. E le gata i lea, o ituaiga tagata i totonu o le nuu, pe o ni tagata malolosi po'o ni tagata vaivai.

Peita'i e foi mai le asiasiga a le nu'u, o foliga uiga ese ia na maitauina e sui o ituaiga o Isaraelu i totonu o Kanana. O le mea mata'utia na o latou molimauina, o lona laueleele ma ana mea totō; faataitaiga o le vine. Fai mai la latou mau o le vaitau o le ulua'i fua, lea e fai mai le fuaiupu e 20 "O ona po foi ia o vine e muai matutua" o lona uiga o uluai fua o le faatoaga e lei faaaogaina muamua e se tasi. E le gata i lea fai mai ina ua latou uia le alia o Esekolo o le latou molimau fai mai "...ona latou sala ai lea o le la o le vine ma le fuifui vine e tasi, ua tausoa e le toalua i le amo..." O le faailoga lena na iloa ai e Mose ma le nuu o Isaraelu, o le matua'i tamaoaiga lava o Kanana le nuu na folafolaina. E tamaoaiga i laau totō ma mea taumafa mo le tagata.

Afai o le vine na tausoa e le amo e tagata e toalua, a vaai faa le mafaufau i ai i le taimi nei, o le vine ua na ona ni fua itiiti lava, peitai o le tala fai mai na amo e tagata e toalua. O lona uiga o le matua'i tele lava o fua o le vine. O le matautia foi na ma le silisili ese o mea e faia e le Atua mo le tagata. O i'ina foi e iloa ai le alofa tunoa o le Atua, o lona alofa tigã ona fultua mai lona nuu ia te ia, ae peitai e le mafai lava ona ia faagalo Isaraelu. Ua na ona o atu lava nonofo loa i manuia o le laueleele ua uma ona tapenaina e le Atua mo i latou. O le ata vaaia foi lena o manuia mo Isaraelu, ae faapea le feagaiga ua uma ona osi ma le Atua.

Tatou le fanau, ia outou manatua le alofa o le Atua mo oe ma au. O manuia o le Atua ma lona tamaoaiga e faasoa mai mo i tatou i lea aso ma lea aso; o iina tatou te molimau ai e le tuulafoa'iina lava i tatou. Tatou vaavaai ia Isaraelu, e le'i tuua lava e Atua lona nuu. Na Ia tausii,


na Ia fafaga, na Ia tapena mea uma mo le nofo lelei ma le fofoga taumafa o ona tagata. O le ata vaaia o le mafutaga vavalalata a le Atua ma i tatou. Ia manuia tele outou le fanau i le alofa ma le agalelei o le Atua.

### Uiga o Upu:

- |      |                 |   |  |
|------|-----------------|---|--|
| i)   | Asiasiga        | – | asiasi, po’o se tagata olo’o malaga e matamata ma va’ava’ai, po’o se tagata foi olo’o alu e tafao.   |
| ii)  | Itu i toga      | – | Negev or South, poo le itu i Saute. (Faamatala i tamaiti le itulagi po’o le direction e faigofie ai ona malamalama North, South, East, West) |
| iii) | Faatoaga lauapi | – | o se nofoaga ta’alaelae poo se nofoaga e le o si’omia e se pa. O se fanua mafola, e malolo ma mapu i ai tagata malaga.                       |
| iv)  | Nofo ‘olo       | – | o le nofoaga lea ua fausiaina pe puipuina e ‘olo maualuluga po’o pa tetele. E puipuina ai se nuu mai o latou fili.                           |
| v)   | Lafu lemü       | – | e faatatau i se nofoaga po’o se fanua laugatasi e ola lelei ai laau  |
| vi)  | Lafuã           | – | e faatatau i se fanua e le ola lelei ai ni laau poo ni mea totõ. Faataitaiga, o se fanua e tele ai ma’a ma’a.                                |
| vii) | Faalototetele   | – | faamalosi ‘au, po’o le finau mo se faamoemoe lelei   |

### GALUEGA FAATINO: PASO

Saili e oe le auala e amata ai se ia o’o i le fa’ai’uga, o le malaga a Isaraelu e o i Kanana.



**PESE: FAAMALOLOSI ‘AUA LE FAAVAIVAI**

Faamalolosi ‘aua le faavaivai  
 Olo’o soifua le Atua i taimi uma  
 ‘Aua le fefe male palaai, tumau i le Atua  
 E te mafaia mea uma mo Ia.

**Tali:** O le Atua, le Atua o le ola  
 O le Atua malosi, silisili  
 E ofoofogia lou mana i tagata uma lava  
 E te mafaia mea uma mo Ia...*(fati: pese “Faamalolosi tau le taua lelei” Peace Chapel)*

**A’OA’OGA:**

1. ‘Aua le fefe pe a fetaia’i ma faafitauli.
2. Faamoemoe i le Alii i taimi uma.
3. O le faatuatua i le Atua, o lou talitonu ato’atoa i mea e le o vaaia e o tatou mata.

# ASIASIGA I TOTONU O LE NU'U O KANANA



\*\*\*\*\*

**ASO SA:** 14 Mati 2021

**MATAUPU:** **UA SAILI NIKOTEMO IA IESU**

**SINI:** Ia malamalama le vasega o le ola saili i le Atua i so'o se mea ua le mafai ona tatou iloa, faapena foi ona fesoasoani le Agaga o le Alii e faamalamalama atili mo i tatou.

**TUSI FAITAU:** Ioane 3: 1 -17 (Mo le Faiaoga)  
Ioane 3: 1 – 6 (Mo le vasega)

### **FESOASOANI MO FAIAOGA:**

O Nikotemo o se tasi o le 'au Saneterini (*Sanhedrin*). O Saneterini o ta'ita'i nei o le lotu. O i latou o tagata e tele lo latou tamāoaiga, lea la e i ai ma Nikotemo. O ia foi o le faresaio po'o le a'oa'o o le tulafono i totonu o le lotu.

Ae o le mea ua tupu, o lea ua alu Nikotemo ia Iesu ua ia fesili ma ua ia saili atu ia Iesu e uiga i le mālō o le Atua. O Nikotemo o ia o se tagata e atamai tele i a'oa'oga o le Tusi Paia. O se tagata e poto ma e fa'amaoni ana upu. O le mafuaaga foi lea o le fesili o Nikotemo ia Iesu, auā e ui lava i lona atamai i le Tusi Paia, a'o le mea moni, e le o malamalama tele o ia i a'oa'oga a le Alii Faaola.

Auā afai o ia o le a'oa'o o le lotu Iutaia, e le tatau la ona fesili ia Iesu auā ua ia iloa le Tusi Paia atoa. Peitai o ia o le tagata e naunau e fia iloa ma fia malamalama atili i le finagalo o le Atua. O le ala foi lea o le saili atu o Nikotemo ia Iesu. Na ia alu ane ia te ia i le po ona o lona naunau tele. E le gata i lea, ua manatu Nikotemo, o se taimi lelei lea ma se laolao lelei, na te mauaina ai le Alii Faaola, auā o le aso atoa o le taimi lea o lo'o fai faamalologa ma vavega a le Alii o Iesu. Aemaise ai, o le vaitaimi o le malosi o le tete'e atu o ta'ita'i o le lotu Iutaia i a'oa'oga a Iesu; aemaise foi lo latou le taliaina o le afio mai o Iesu ma ana a'oa'oga.

O le pogai lea o le alu ifo ma le saili ane a Nikotemo ia Iesu, ua ia mana'omia tele se fesoasoani mo le faapupulaina atili o ana a'oa'oga. O a'oa'oga ina ia malamalama atili ai le tagata pogisā i le finagalo manino o le Atua.

Tatou le fanau, ia o tatou sailiili i le Atua i taimi uma. Ia o tatou fesili i le Atua i mea ua tatou pogisa ai ma mea ua le mafai ona tatou malamalama ai. O Iesu o le uo a tamaiti na ia ofoina mai lona ola e fai ma faaolataga mo le lalolagi atoa. O le ata manino lenā o le Atua e alofa ia i tatou uma.

### **Uiga o Upu**

- i) Faresaio – o a'oa'o le tulafono i totonu o le lotu Iutaia, e i ai lo latou talitonuga e i ai le ola i tua atu o le oti
- ii) Faipule – e pei o i latou nei o sui o le lotu, i totonu o le fa'alapotopotoga o ta'ita'i o le lotu Iutaia e to'a 70. (Member of the Jewish ruling council)



- iii) Rapi – ua faaliliuina mai le upu Eleni o le Rabbi o lona uiga o le faiaoga i le lotu Iutaia. O se igoa e ave i tagata maualuluga pei o le master, o le igoa foi na faaigoa ai le Alii o Iesu. Po’o le faiaoga i le lotu Iutaia
- iv) Faatuatua – talitonu ma faamoemoe ma faalagolago i mea e le o vaaia e o tatou mata
- v) Faamasino – o le faia lea o se faaiuga amiotonu i se va o ni tagata se to’alua, pe a o’o ina i ai se mataupu taua e talanoaina.

### **GALUEGA FAATINO: TALI I LE SA’O POO LE SESE**

1. O Nikotemo o se tasi o so’o o Iesu.
2. Na alu Nikotemo ia Iesu i le aoauli
3. *E moni ou te fai atu ia te oe, a le toe fanau le tagata, e le mafai ona iloa e ia le malo o le Atua....o upu ia a Iesu.*
4. O le toe fanaufouina o le salamo faamaoni i manatu o Iesu

**PESE:**           SEEK YE FIRST THE KINGDOM OF GOD / SAILI MUAMUA LE MALO O LE ATUA

Seek ye first the kingdom of God  
 And His Righteousness  
 And all these thing shall be added on to you  
 Allelu alleluia  
 Alleluia Allelu Alleluia×2

Saili muamua le mālō o le Atua  
 Ma lana amiotonu  
 Ona fa’aopoopoina lea ia te oe  
 Mo aso uma o lou olā  
 Alleluia Allelu Alleluia×2

### **A’OA’OGA:**

1. Tatou fesili i le Atua i mea ua tatou le malamalama ai.
2. O le Atua e fesoasoani mai pe a tatou saili atu mo ia.
3. E fai e le Atua faamasinoga tonu mo i tatou.

**UA FESILI NIKOTEMO IA IESU**



\*\*\*\*\*

**ASO SA:** 21 Mati 2021

**MATAUPU:** **VALAAUINA O IEREMIA**

**SINI:** Ia malamalama le vasega i le tãua o tofiga ma valaauiina e tofia ai i tatou

**TUSI FAITAU:** Ieremia 1: 1 – 10

**FESOASOANI MO FAIAOGA:**

O le tatou tala lea sa faitauina i lenei taeao, o le valaauiina lea o Ieremia e fai ma perofeta i le nuu o le Atua. O le perofeta o le tagata e auala mai ai le finagalo o le Atua mo lona nuu. O Ieremia la, o le perofeta filifilia po’o le perofeta na valaauiina e le Atua. O le tagata ua leva ona valaauiina. Na tofia lava o ia a’o le’i faia o ia i le manava o lona tinã. O lona uiga, e ese le taua tele o le tagata i lona va feagai ai ma lona Atua. E faataua e le Atua tagata uma, e ui lava i le laitiiti ma le faatauvaa o Ieremia ae peita’i o lea ua tofia e le Atua e fai ma perofeta.

Ae ua fa’aloaloa le aao o le Atua, ma pa’i i le gutu o Ieremia. Ua ia fetalai atu foi “Ua ou tu’uina atu a’u upu i lou gutu” O le faailoga ua au faatasi le Atua ma Ieremia i sona le malamalama ma sona faatauvaa. O lona uiga e fai e le Atua mea silisili mo i tatou uma. E valaaui mai lava le Atua ia i tatou e faatino so o se valaauiina e finagalo ai o Ia. Ae ao ia i tatou ona talia ma le loto maulalo ma le loto fiafia tofiga a le Atua ia i tatou.

Tatou foi le fanau, e faaaogaina lava i tatou e le Atua i so’o se valaauiina e finagalo iai, pe afai e i’u ma le manuia le aoga. Po’o le a lava lo tatou faatauvaa ma lo tatou le iloa o se mea, ae a tatou taumafai i le Atua e faapena lava ona faatasi mai lona agaga e tauto’alua lo tatou ola. E le manatu faapito le Atua i tofiga ma valaauiina eseese o i tatou. Auã e taua ma tutusa tagata uma i lana vaai. O i tatou o le fanau o lo’o tutupu a’e ia Keriso. Ia o tatou faatauinaina o tatou tiute o tatou o ni tama ma ni teine lelei i totonu o aiga. Faatãua lou valaauiina, ma tofiga mai le Atua ona manuia lava lea o lau savaliga.

**Uiga o Upu:**

- i) Valaauiina – sau mai le upu valaaui. E mafai foi ona faapea o le tau fonõ, o le filifilia poo tofiga
- ii) Afioaga – upu a le Alii
- iii) Nofoaiga – o se upu e faamatala ai se saofaiga a se tagata maualuga poo se tupu o se atunuu
- iv) Gataaga – e sau mai le upu gata, e mafai foi ona fa’apea o le i’uga o se mea
- v) Tafeaga – ave faa tagata pologa i lalo o se isi ta’ita’iga a se tupu o se isi nuu
- vi) Faapaiaina – faamanuiaina
- vii) Faaloaloa – tu’u mai po’o le tu’u atu o le lima
- viii) Lia’iina – vele ese po’o le se’i ese
- ix) Lepetia – faaleagaina
- x) Faaumatia – sau mai le upu uma, o lona uiga ua leai se mea o totoe
- xi) Soloia – solo i lalo poo le talepeina / faaleaogaina
- xii) Fa’atüina – toe faatü i luga, poo le fausiaina o se mea
- xiii) Totõina – toe totõ se laau, poo le faaolaina

**GALUEGA FAATINO:** Taligã Fesili

1. O le a le valaauina o Ieremia?
2. O ai le tamã o Ieremia?
3. O le a le taimi na tofia ai e le Atua Ieremia?
4. O le fia o tausaga o Ieremia na valaau ai le Atua ia te ia?
5. Aisea na musu ai Ieremia ina ua valaau le Atua?
6. Pe faapefea ona o tatou iloa ua auai le Atua ia Ieremia?

**PESE:** O LE VALAAUINA O IEREMIA

O Ieremia o se perofeta  
 Na valaauina e le Atua  
 E fai ma ana auauna, e tala'i i lona finagalo  
 E ui i lona laitiiti ae na usitai lava i le Alii  
 Fa'aaoga lona faatauva'a  
 Momoli ai lana feau i tagata

**Tali:**

Na Ia valaauina outou  
 Na Ia valaauina tatou  
 O Ieremia o se perofeta  
 Na valaauina e le Atua.....*(fati: E to'a sefululua o le 'au so'o na valaauina e Keriso)*

**A'OA'OGA:**

1. Ia fa'atãua lo tatou valaauina ua tofia ai i tatou e le Atua.
2. 'Aua tatou te manatu fa'atauva'a i lo tatou valaauina.
3. E i ai le Atua i mea uma.

\*\*\*\*\*

**ASO SA:** 28 Mati 2021 (ASO SA LAUPAMA)

**MATAUPU:** **UA TI'ETI'E IESU I LE ASINI**

**SINI:** Ia malamalama le vasega – o le tietie o Iesu i le asini o le faailoga o le tulaga maualalo ma le faatauva.

**TUSI FAITAU:** Mataio 21: 1 -11

**FESOASOANI MO FAIAOGA:**

Ua tatou faamanatu lava lenei aso taua i tausaga uma i le kalena faa-kerisiano o le Aso Sa Laupama, po'o le Aso o Le Malaga Faatupu a Iesu i Ierusalem. Ua a'oa'oina mai foi lenei tala i le taua o le lagonaina e tagata Kerisiano o Iesu ma lona ti'eti'e atu i Ierusalem i luga o le asini. Auã a fua i le vaai faa le tagata lava ia i totonu o le mālō o Iutaia, e le taitai lava ona fetui i se tupu ona ti'eti'e i se asini.

O le faaaogaina e Iesu o le asini e ti'eti'e ai mo lana malaga, o se auala maualalo tele ma se auala le tauoloa. A'o le ti'eti'e i le solofanua, o le faailoga o le malosi ma le tupu uiga ese e ti'eti'e ai. Ma o le auala foi lea na filifili e Iesu. Ai na manatu tagata o le afio mai o le Alii o Iesu, e sau i ni kariota ma ni solofanua malolosi e tietie mai ai. Peita'i e le o le finagalo lea o le Atua. O le ala foi lea o le alalaga o tagata Osana i le Alo o Tavita, Ia manuia le Afio mai i le Suafa o le Alii, Osana i mea aupitoaluga.

O le uiga o le upu "Osana" Ina faaola mai ia i matou. O le ala lea o le alalaga o tagata, ai faapea o le sau o Iesu e faaola ma faasaoina mai i latou i lalo o le pulega a le mālō o Roma. Ae o le afio mai o Iesu, o le Tupu na afio mai i se ala e lei mafaufauina e tagata. O se auala maualalo, o se auala filemu; e faapena foi lana feau na afio mai e tala'i i le lalolagi. E le o le Faaola faa le tino, a'o le afio mai o Iesu o le Faaola i agaga.

Le fanau e, ua tatou faamanatuina lenei Aso Sa, o se Aso tatou te lagonaina ai le loto maualalo ma le loto ua salamo faamaoni. E tatau ona tatou taliaina Iesu e fai ma Faaola i o tatou tagata eleelea ma le palapalā. O le Afio mai o Iesu ma lona tietie i le asini, ia fai o se a'oa'oga taua mo i taua tama ma teine a'oga. Ia e mafaufau loloto ai i le alofa ma le agalelei o le Atua mo i tatou uma.

**GALUEGA FAATINO:** Faatino le Tala

Faatino le vaaiga lea i le malaga atu ma le tietie o Iesu i le asini.

**PESE: OSANA PEPESE**

Osana pepese  
 Tamaiti uma ×2  
 Osana pepese  
 Tamaiti uma ×2  
 Ua afio mai le Tupu

Ua tietie atu i Ierusalema  
 I Ierusalema ×2  
 Ua tietie atu i Ierusalema  
 I luga o le asini

### A'OA'OGA:

1. Ia tatou lagonaina le loto maulalo e faatino ai a tatou feau
2. Manatua o Iesu o le uo silisili a tamaiti
3. E alofa Iesu i tamaiti uma

## Osana Pepese Tamaiti Uma


Traditional Sunday School Song

O sana pe pese ta mai ti uma ta

mai ti uma ta mai ti uma O sana pe pese ta

mai ti uma Ua a fio mai le TU PU

# UA TI'ET'E IESU I LUGA O LE ASINI



\*\*\*\*\*

## MANATU TAIALA O APERILA: FAAILOGA O LE TALA LELEI

O le talai le toe tu mai o Iesu nai e ua oti, ua fai ma autu o lenei masina, aua ua ia aumaia ai ni faailoga o le Tala Lelei, e fai ma a’oa’oga mo tatou le fanau. O le fetalaiga a le taulealea ua ofu i le ofu pa’epa’e tatapuvae, na fai i fafine e toatolu na o e asi le tuugamau, “Aua tou te matatau, o lo o outou saili ia Iesu na faasatauroina, ua tu o Ia...”

**ASO SA:** 4 Aperila 2021 (ASO SA TOE TU)

**MATAUPU:** TALA LELEI FA’AAUUAU

**SINI:** Ia malamalama le vasega, e faigofie ona tatou iloa ona fa’auau le Tala Lelei ia Iesu, pe afai tatou te matua mulimuli ma le faamaoni ia te Ia.

**TUSI FAITAU:** Mareko 16: 1 – 8

### FESOASOANI MO FAIAOGA:

O le molimau lea a Mareko i le Toe Tu mai o Iesu. Na o atu ai Maria le Makatala, ma Maria le tinā o Iakopo atoa ai ma Salome e asi le tuugamau o Iesu. Sa latou fetautalatalaa’i ma le lē mautonu, po o ai o le a na fuliese le ma’a tele o lo o pupuni ai le gutu o le tuugamau, ae sei o atu e uu i le tino o Iesu. A o se vaaiga na matuā ofo ai nei tinā e toatolu, e taunuu atu ua uma ona fulieseina le ma’a tele sa i le gutu o le tuugamau. Ua latou ulu atu i le tuugamau, ona latou iloa lea o le taulealea o nofo i le itu taumatau, ua ofu o ia i le ofu pa’epa’e tatapuvae, ona latou matata’u ai lea.

O le vaega tonu lea o le tala, o lo o atagia mai ai la tatou manatu autu “Tala Lelei fa’auau.” Ina ua tali atu lenei taulealea o lo o ofu i ofu paepae tatapuvae”Aua tou te matatau, o lo o outou saili ia Iesu le na faasatauroina, ua tu o ia, e lē o iinei. A ia outou o atu, ina ta’u atu i ona so’o atoa ma Peteru, e muamua atu o Ia ia te outou i Kalilaia.”

Ioe tamaiti, o le Tala Lelei fa’auau lena, na faatonuina ai e le taulealea ofu pa’epa’e tatapuvae fafine nei toatolu, o Maria le Makatala, Maria le tinā o Iakopo atoa ai ma Salome. E fai i latou ma molimau i le vaaiga lea ua tupu ia Iesu, ua Toe Tu o Ia. Ia o atu ma talai atu lenei Tala Lelei o le Toe Tu i so’o o Iesu atoa ai ma Peteru. E le gata o fafine na uluai molimau o le Tala Lelei, ae ao ona fa’auau le faailoaina atu o lenei Tala Lelei i le au soo ma le motu o tagata.

Fanau, ia fai i tatou ma molimau a Keriso e fa’auau lana Tala Lelei, e le gata o totonu o aoga, aiga, le lotu ae faapea foi ona tatou olaina lea Tala Lelei.

### Uiga o Upu

- |      |                  |   |                         |
|------|------------------|---|-------------------------|
| i)   | fetautalatalaa’i | - | talatalanoa, fefaasoa’i |
| ii)  | matata’u         | - | fefefe                  |
| iii) | tulieseina       | - | tulei ese               |



iv) ofu tatapuvae - ofu e gata i alofivae/ofu tele/kimona

### **GALUEGA FAATINO: FAATINO LE TALA**

E lelei pe a faatino e le fanau le tala, ina ia latou malamalama tonu i le vaaiga na tupu i lea aso, ina ua Toe Tu Iesu, e tusa ma le molimau a Mareko.

### **PESE: LE TAEAO SEGISEGI**


Le taeao segisegi le vaveao e lei malamalama  
 Le Tala Lelei mo oe, le Tala Lelei mo a'u  
 O Miriama ma Maria ma Maria le Makatala  
 Le Tala Lelei mo oe, le Tala Lelei mo a'u

Ua iloa le tuugamau avanoa  
 Ua le o i ai toe o ie na laei ai  
 Ua leo iinei o Ia ae ua toe soifua mai  
 Le Tala Lelei mo oe, le Tala Lelei mo au... (*lyrics: Suliveta Kurene*)

### **A'OA'OGA:**

1. O le toe tu o Iesu: O le Tala Lelei fa'aauau lea.
2. O tatou o avefeau o le Tala Lelei a Keriso.
3. O le Tala Lelei a Iesu, e amata ia te oe ma lou aiga.

**MARIA LE MAKATALA, MARIA LE TINA O IAKOPO MA SALOME**



\*\*\*\*\*

**ASO SA:** 11 APERILA 2021

**MATAUPU:** **UA MASAE LE LAGI**

**SINI:** Ia a’oa’oina le fanau ina ia malamalama, o le masae o le lagi, o le faailoga o le afio ifo o le Atua e ala i lona Agaga Paia, e tautoaluaina le galuega faaola o le a feagai ma Iesu i le lalolagi.

**TUSI FAITAU:** Mareko 1: 9 – 13

### **FESOASOANI MO FAIAOGA:**

O le tatou mataupu o lenei Aso Sa tamaiti, “Ua masae le lagi” e pei ona faamatalaina e Mareko. Peitai o le isi ona uiga, “Ua fa’aavanoaina le lagi” e pei ona faamatalaina e Mataio ma Luka.

O le tala e faapea, ua afio atu Iesu i Kalilaia i le taimi tonu na faia ai le papatisoga a Ioane le Papatiso

Manatua foi tamaiti, o le galuega a Ioane le papatiso, o le papatisoina lea o tagata i le vai. O lona uiga, o le famamaina lea o loto o tagata mo le afio mai o le Mesia. Pe mafai foi o na faapea, ia salamo tagata mai a latou agasala. Fai mai Ioane i le motu o tagata na tumutumu ai i lea aso, “O a’u nei, ua ou papatiso atu ia te outou i le vai, a o Ia, na te papatisoina outou i le Agaga Paia.” Sa taunuu lava upu a Ioane, aua ina ua papatisoina Iesu e Ioane, faauta ua masae le lagi, po ua avanoa foi le lagi, ona iloa ai lea o le Agaga ua afio ifo i ona luga, e peiseai se lupe. O le siufofoga foi mai le lagi ua faapea mai “O lou Atalii pele oe, ou te fiafia ia te oe.”

Tamaiti, o le masae o le lagi o le faailoga o le afio ifo o le Agaga o le Atua, e papatisoina Iesu lona Alo, aua le galuega faaola o le a feagai ma Ia i le lalolagi. O le afio mai lava lea o le Atua e fesoasoani ia Iesu i lana galuega laveai. O le masae o le lagi, e mafai foi ona faapea, ua tatala mea uma ia Iesu, e ala i le fesoasoani a le Agaga o le Atua. Ua leai se mea na te mafai ona toe vaioa Iesu i lana galuega, e oo lava i le tiapolo (Satani) na te le mafai ona vaioa Iesu i lana galuega, aua o le galuega ua oo mai sei faaola tagata ua lilofia i faiga a le agasala.

Tamaiti, o le afio o le Agaga Paia ia Iesu e faapena foi ona auai mai mo i tatou. O le Agaga Paia ua fai ma fesoasoani sili i ai tatou. O a mea e faigata tatou te fetaiiai, ia tatou faalagolago i le Agaga Paia e fesoasoani mai.

### **Uiga o Upu**

- |      |           |   |          |
|------|-----------|---|----------|
| i)   | papatiso  | - | faauu    |
| ii)  | siufofoga | - | leo      |
| iii) | faosooso  | - | tofotofo |
| iv)  | fagafulu  | - | 40       |

**GALUEGA FAATINO: TALIGA FESILI**

Tali fesili nei ?

1. O ai na ia papatisoina tagata i le vai?  
Tali: O Ioane le papatiso
2. “Ua masae le lagi” Ta’u mai le isi ona uiga.  
Tali: Ua avanoa le lagi.
3. Tusi mai i fuainumera le upu “fagafulu”  
Tali: 40
4. Na papatisoina e Iesu tagata i le a?  
Tali: Agaga Paia

**PESE: O IESU LE KALILAIA**

O Iesu le Kalilaia  
 Ua papatisoina  
 E Ioane i Ioritana  
 I le vai ma le Agaga  
 Ua masae le lagi  
 I lona Alo e toatasi  
 Lou atalii pele  
 Ou te fiafia ia te oe.....(*fati : Ua ou filifili e mulimuli ia Iesu*)

**A’OA’OGA:**

1. O le Agaga Paia, o lo tatou fesoasoani sili.
2. Mulimuli ia Iesu e manuia ai.
3. E le tuulafoaiina i tatou e le Atua.

**UA PAPATISOINA E IOANE IESU**



\*\*\*\*\*

**ASO SA:** 18 APERILA 2021

**MATAUPU:** **LEFULEFU MAI LE UMU**

**SINI:** Ia malamalama le vasega, o le lefulefu na fa'aaoga e le Atua, e ala ia Mose ma Arona, e faaoo ai le malaia (faama'i) ia Aikupito.

**TUSI FAITAU:** Esoto 9: 8 – 12

### **FESOASOANI MO FAIAOGA:**

O le mala lona ono lenei, mai mala e sefulu na faaoo e le Atua, e faaumatia ai Aikupito e ala ia Mose ma Arona. Na uma loa le mala lona lima i le faama'i na faatamaia uma ai manu ma so o se meaola, i totonu o Aikuptio, sosoo loa ma le faama'i lenei na aafia ai tagata uma o Aikupito, e aunoa ma se Isaraelu na aafia ai.

Na faatonuina e le Atua Mose ma Arona ina ia faatutumu o la lima i lefulefu mai le umu ma saaluu solo ai i luma o Farao. O se vaaiga ofoofogia tamaiti, o le taimi lava na saaluu ai i luma o Farao lefulefu nei, na faafuaseia ona liu efuefu ninii, ona tupu mai ai lea o le ma'i fulafula na aafia uma ai tagata Aikupito faapea foi a latou manu. Ua oo foi i taulaitu a Farao, o tagata e i ai lo latou malosiaga faapaupau, na aafia uma ai i lenei faama'i, o le ma'i fulafula.

Tamaiti, e ese le faatauva'a o le lefulefu i la tatou vaai, peitai na fa'aaogaina e le Atua, e ala mai ai lenei faama'i e faaumatia ai Farao ma tagata Aikupito ona o lo latou faamaualuluga, ma le lē anaana i le Atua. O se aoaoga foi mo tatou – e matautia le silisili ese o le Atua. O le Atua e pule aoao i mea uma lava e oo a i le tagata na ia faia. O le mala i le lefulefu mai le umu o le faaalua lava lea o le Atua silisili ese. Ina ua le talia e Farao le o ese mai o Isaraelu mai lo latou nuu...Ia manuia tele outou le fanau.

### **Uiga o Upu:**

- i) saaluu - lulu, faasalalau, faataape
- ii) manunu - popole vale, fefefe
- iii) taulaitu - tagata faitogafiti pepelo

### **GALUEGA FAATINO : FAATUMU AVANOA**

#### **Faatumu avanoa i upu o lo o i lalo?**

Arona, Farao, fetalai , lefulefu, faatutumu, saaluu

Ona (1)\_\_\_\_\_ mai lea o le Alii ia Mose ma (2)\_\_\_\_\_. Ia (3)\_\_\_\_\_ oulua lima uma i (4)\_\_\_\_\_ mai le umu, ma ia (5)\_\_\_\_\_ solo ai i luga e Mose i luma o (6)\_\_\_\_\_.

TALI : 1 – fetalai, 2-Arona, 3-faatutumu, 4-lefulefu, 5-saluu, 6-Farao

**PESE: O LE ALII UA FETALAI**

O le Alii ua fetalai

Faalogo mai x 3

O le Alii ua fetalai

Faalogo mai

Mose ma Arona faalogo mai x 2

O le lefulefu ia saaluu solo


I luma o Farao fiapoto.....(*fati: Faitau le Tusi Paia ma tatalo i aso uma*)

**A’OA’OGA:**

1. E le fiafia le Atua i le tagata fiapoto
2. Aua nei o tatou pei o Farao le tupu lē faalogo.
3. E lavea’iina i tatou e le Atua, pe a tatou faalagolago ia te Ia.



# O LE MALA LONA 6 NA A'AFIA AI AIKUPITO



\*\*\*\*\*



**ASO SA:** 25 Aperila 2021

**MATAUPU:** **O LE KIKAIONA**

**SINI:** Ia malamalama le vasega, o le kikaiona na saunia e le Atua e fai ma lavea'i o Iona, mai ona tiga.

**TUSI FAITAU:** Iona 4: 5 – 11

**FESOASOANI MO FAIAOGA:**

Manaia ae amata e lau susuga le mataupu o lenei Aso Sa, i ni nai fesili e fesiligia ai le fanau, po o latou manatua, “O ai foi lea tagata o Iona?”

Nisi nei o tali e fesoasoani i lenei fesili:-

- O Iona o le perofeta a le Atua
- Na faatonuina e le Atua Iona e alu e ta'u ia Nineva a latou agasala, ina ia salamo.

Na toe foi Iona e ta'u ia Nineva le finagalo o le Atua, ina ia latou salamo mai ia latou agasala. Ona ia alu lea ma nofo i le itu i Sasa'e o le aai (Nineva). Na ia faia ai le fale apitaga ma nofo ai i lalo o lona paolo. Sa nofo ai iina Iona ma faatalitali po o le a, o le a oo i le aai o Nineva. A ua saunia e le Atua le kikaiona ua ia faasosolo i luga o Iona, e fai ma faapaologa i luga o lona ulu, e lavea'i ia te ia ai ona tigiā.

Sa matua fiafia tele Iona ona o le kikaiona, peitai na toe saunia e le Atua o le anufe, ina ia atia le kikaiona, ia vave ona mago ma pe. O le taunuuga o le tala tamaiti, na ita tele Iona ona ua atia ma mago le kikaiona, ona ia faatoga lea i le Atua ia oti.

E lei faia e le Atua le mea na faatoga atu ai Iona, a ua Ia a'oa'o ia te ia se feau taua, e ao ona tupu lona alofa ia Nineva le aai o lo o i ai tagata e toatele. Ia sili atu le alofa ia Nineva nai lo le kikaiona. O le feau o le Tala Lelei mo tatou le fanau i lenei aso o le ALOFA. Alofa ia te oe, o lau vasega, o ou matua, aiga, nuu, lau aoga ma le Ekalesia, ma so o se tagata.

**Uiga o Upu:**

- i) kikaiona - o le laau e sosolo faaofuofu
- ii) ogotia - taia, aafia
- iii) fale apitaga - fale ie

**GALUEGA FAATINO: PASO**

Saili mai upu nei i le paso

1.	apitaga	A	A	E	I	N	O	I	M
2.	kikaiona	K	I	K	A	I	O	N	A
3.	Nineva	I	A	A	L	N	T	O	T
4.	matagi	O	N	T	U	E	I	S	A
5.	Iona	N	O	A	A	V	A	I	G
		A	P	I	T	A	G	A	I

**PESE:**

Lo'u Atua e  
 O le kikaiona ua e aumai x 3  
 Le kikaiona ua te'a ai lo'u vaivai


**Tali:**

Le kikaiona poo fea o i ai  
 Le kikaiona sei lavea'i mai  
 Le Atua o a'u o Iona sei e alofa mai. (*fati: Lou Atua e ua ou fia ai, Ia e fafaga ia te a'u*)

**A'OA'OGA:**

1. O le alofa o le Atua, na te mafai ona liua o tatou tagata mai le leaga.
2. Usitai i le fetalai mai o le Atua.
3. Alofa i so o se tagata.

# O IONA MA LE KIKAIONA



\*\*\*\*\*

**ASO SA:** 2 Me 2021

**MATAUPU:** **O PU'A MA SEPELA**

**SINI:** Ia malamalama le vasega, o le mata'u i le Atua, e taunuu i manuia.

**TUSI FAITAU:** Esoto 1: 15 – 22

**FESOASOANI MO FAIAOGA:**

O Pu'a ma Sepela, o ni tinā faatosaga ta'utau'a o Aikupito. O le la galuega, o le faafanauina lea o ni fafine ma'itaga. E le o se galuega faigofie, aua e i ai le ola ma le oti o se tagata o le a fanau mai.

Na faatonuina i laua e Farao le tupu o Aikuito, e fasioti i pepe tama Eperu, pe a fananau mai, ae faasao i pepe teine. Aua o i laua, sa feagai ma le faa-fanauina o fafine Eperu. Na o la iloa lelei, o se faatonuga lē alofa ma le sauā, na faia e Farao, aua o fafine e matata'u i le Atua. O lona uiga, la te silafia lelei e sa i le tulafono a le Atua le fasioti tagata. Na fesiligia i laua e Farao pe aisea na la faaolaina ai tama tane Eperu. Ae na faapea i laua, e malolosi fafine Eperu, e taunuu atu ua uma ona fananau. Na lē fiafia Farao, ona ia toe faia ai lea o le isi tulafono. O tama tane Eperu uma e fananau mai, ia lafo i le vaitafe, ae faaola na o teine.

Fanau, o le matatau o Pu'a ma Sepela i le Atua, na faamanuia i ai le Atua, ia i laua ma o la aiga. A o le auala lava lea, na tapenaina ai e le Atua le faaolataga mo lona nuu, e ala i nei tinā faatosaga. O tina faatosaga nei sa fai ma faaola i fanau a Isaraelu. O se galuega lelei tele. O se aoaoga foi lea mo tatou le fanau – Ia tatou fefefe ma matatau i le Atua pei o nei tina faatosaga. O a faaosoosoga ma mea faigata o le ola tatou te fetaiiai, e fesoasoani mai lava le Atua ia i tatou pe a tatou ola matatau i le Alii. Ia manuia tele outou le fanau.

**Uiga o Upu:**

i) Faatosaga : fafine e faafanauina tina maitaga

**GALUEGA FAATINO: TA'U MAI NI UPU E FAAMATALA AI TAGATA NEI**

1. Pua & Sepela.....ff:faatosaga, fafine matata'u...

2. Farao

**PESE: O LIMA AOGA**

O lima o Pua ma Sepela  
 O lima agalelei  
 E alofa ai i tagata uma  
 Sa la teena o le pule sauā

Ia faaola pepe tama  
E ola matatau i laua  
E usitai i le Atua.....(*fati: O lima o Iesu*)

**A'OA'OGA:**

1. O le ola mata'u o le usitai lava lea.
2. E pule aoao le Atua i mea uma.
3. E le manumalo, ni taitaiga leaga.

**O PU'A MA SEPELA O FA'ATOSAGA AIKUPITO**



\*\*\*\*\*

**ASO SA:** 9 ME 2021

**MATAUPU:** **O AI EA LO’U TINĀ? (ASO SA O TINĀ)**

**SINI:** Ia malamalama le vasega, e mana’o le Atua i tinā latou te faia lona finagalo.

**TUSI FAITAU:** Mataio 12: 46 – 50

### **FESOASOANI MO FAIAOGA:**

O le aso lenei ua faataua ai ma faamanatu ai le taua o Tina. O le tatou mataupu i lenei aso Sa, e faatatau lea i le Tina ia Maria. Faimai le tala o lo o a’oa’o atu Iesu i le motu o tagata, e uiga i a’oa’oga o le malo o le Atua. E lua a vaega taua o lo o a’oa’o ai Iesu, o galuega alofa e tataua ona faatino i le sapatu, ma lona ta’u leagaina o le taufaifai ma le tau lamalama o faresaio ma tusiupu.

Na logo atu ia Iesu, e se tasi o ē na faalogologo i ana a’oa’oga, “o lo o i fafo lona tinā ma ona uso, ua fia tautala ma ia. Peitai, o le finagalo o Iesu, ua na o i latou e faia le finagalo o lona Tamā o i le lagi, e taua o lona tinā, ma lona uso, ma lona tuafafine. O aoaoga a Iesu o lo o aumaia ai le vava lalata o le sootaga o le tina ma lana tama, o le uso ma le tuafafine, e faatusa i ai le vava lalata o lona Tama oi le lagi ma i latou e faia le finagalo o lona Tama.

Ua tatou iloa uma o Maria o le Tina lea o Iesu na fanau mai ai. O le alu atu ai o Maria e saili ia Iesu, o lo o aoaoga mai ai ia i tatou le tiute faatina o Maria o lo o faatino. O le masani lea ma tiute faa-tina alofa faamaoni i lana fanau. E tu i luga ma alu e saili tamaiti pe a ua le vaai atu i ai. O le tina alofa faamaoni e le tuuna lana fanau e o ese ma ia. O le faamoemoe lea o le alu atu ai o Maria e saili ia Iesu.

Ioe fanau, e i ai upu a le poto e faapea, “O le tinā amio lelei, e silisili lava lona tau i penina.” O lo o faasino lava ia upu i le tinā e ola saili i le Atua ma faia lona finagalo. O le tinā foi lena, lea e fetalai Iesu “O lo’u tinā.” O le alofa faatina, o le faaalua mai lava lea o le Alofa o le Atua i ai tatou. Ia tatou alolofa foi ma usiuitai i o tatou tina.

### **GALUEGA FAATINO: TUSIGA SOLO**

Manaia ae faatonu fanau, e tusi mai ni a latou solo e uiga i o latou tinā. E faaulutalaina faapea “**O lo’u tinā.**” Ia lava le lua fuaiupu o le solo, ae ta’i fa laina i le fuaiupu, ina ia lava le taimi e te faasoa ai i fanau.

### **PESE: TAUA O TINA**

Silasila ia i tinā  
 Ua ese lo latou faatuatua  
 Fetalai Iesu, o lo’u tinā  
 O ia na te faia o le finagalo o le Atua.

**Tali:**

O i latou uma nei  
O se tinā e sili lona lelei  
Sa latou a'oa'o  
Fanau ia amio lelei  
Fai mai Solomona e taugata  
E sili ona tau i maa taua ma penina

**A'OA'OGA**

1. O le tinā lelei, na te faia le finagalo o le Atua.
2. Amuia se aiga, o i ai se tinā alofa.
3. E taua o tatou tinā.



# AIGA O IESU



DAVID LINDSLEY  
© David Lindsley DO NOT COPY

\*\*\*\*\*

**ASO SA:** 23 ME 2021

**MATAUPU:** **O LE TATALO A HANA**

**SINI:** Ia malamalama le vasega, o le tatalo tatou te fesootai atu ai i le Atua, i mea tatou te mananao ai.

**TUSI FAITAU:** 1 Samuelu 1: 1 – 18 (Mo le Faiaoga )  
! Samuelu 1: 9 -13 (Mo le vasega)

**FESOASOANI MO FAIAOGA:**

O Elekana e toalua ana ava, o Hana ma Penina. Sa i ai le fanau a Penina, a’o Hana e leai sana tama. Ua faifai ma ua faalili Penina ia Hana ona e le fanau. Ae o lo o taua e le Tusi Paia, o le pule lava a le Atua na le fanau ai Hana.

Sa sili le alofa o Elekana ia Hana nai lo Penina ma lana fanau, le ala lena o lona fesili:

Hana e, se a le mea e te tagi ai?  
Se a foi le mea e te le ai ai?  
Se a foi le mea e tiga ai lou loto?  
E le ua sili ona lelei o a’u ia te oe i tama tane e toatinoagafulu?

A o le fafine, ua tiga lona loto, ua alu atu i le malumalu i lea aso ma lea aso ua tatalo ai i le Atua. Ua tauto Hana i le Alii, na te toe avatu se tama tane na te fanau e auauna i le Alii i aso uma o lona ola. E le oo se tafi i lona ulu, o lona uiga o le tagata ua faapaiaina mo le Alii. Sa manatu le faitaulaga o Eli, o Hana, ua onā i se uaina, aua ua na ona memu o ona laugutu, ae le lagona lona leo. O le pogai lena na fai atu ai le Faitaulaga – *E te ona seia afea?*

Na tali Hana, na te le’i inu i se uaina po o se ava, a’o ia o le fafine ua momoli lona loto i le Alii. Ona tali atu ai lea o Eli “Alu ia oe ma le manuia, ia faapena ona faia e le Alii ia te oe le mea ua e faatoga atu ai ia te Ia.

O le upu moni, e moni ma le malosi o le loto ofoina atu o Hana e ala i lana tatalo i le Atua, na talia foi lana tatalo e le Atua. Ua tali atu Eli ia Hana, *Alu ia oe ma le manuia, ia foi mai foi e le Atua o Isaraelu le mea na e faatoga atu ai ia te Ia.* Mulimuli ane ua foi ai e le Atua le tama tane, ua faaigoa ia te ia o Samuelu, aua ua faafogaina e le Atua le tatalo a Hana. O se aoaoga mo tatou le fanau, e taua lo tatou ola tatalo. O le auala lea e tatou te fesootai atu ai i le Atua.

**Uiga o Upu:**

- i) Faagalologo : le manatua
- ii) Memu : minoinoi laugutu e aunoa ma se leo

## **GALUEGA FAATINO: TATALO**

- Faamanatu vaega o le Tatalo
- Tofia ni tamaiti e fai mai sana tatalo
- Tusi mai se tatalo pupuu

## **PESE: FAI SAU TELEFONI**

Fai sau telefoni  
 Vili ma le faamaoni  
 O loo faatali le Alii  
 Mo oe i soo se taimi  
 Fai sau filifiliga  
 Po o avanoa le laina;  
 Le numera aua nei galo  
 O le T A T A L O –TATALO

### **Tali**

Telefoni maia aua e te faatamala  
 O loo avanoa o le laina  
 Ua uma ona ia faia  
 Ia e vili sao atu  
 O loo faatalitali mai  
 Le laina o loo avanoa mo soo se tasi aua le tuai  
 Le numera aua nei galo  
 O le T A T A L O

## **A’OA’OGA:**

1. E taua le ola tatalo.
2. Saili i le Atua ma le faamaoni
3. E alofa le Alii i so o se tagata.
4. Tatalo ma le loto fiafia

# O LE TATALO A HANA I LE ATUA



\*\*\*\*\*

ASO SA: 30 ME 2021

**MATAUPU: O RAAVA**

**SINI:** Ia malamalama le vasega i le taua o le loto fesoasoani, e faasaoina ai se tagata.

**TUSI FAITAU:** Iosua 2: 1 – 7

### **FESOASOANI MO FAIAOGA:**

O Raava o le fafine Ieriko, ma o lona fale lea na taunuu i ai tagata asiasi e toalua. O i laua ia, na auina e Iosua le taitai o Isaraelu e vaavaai faalilolilo i le aai o Ieriko. Na iloa e le tupu o Ieriko, le tala i nei tagata Isaraelu e toalua. Ona ia fai atu lea ia Raava, ia tuu mai ia o na tagata e toalua na o atu ia te oe. Peitai, sa fesoasoani tele lenei fafine i le faasaoina o ola o ia tagata e toalua mai Isaraelu.

Na ia faasese i auauna a le tupu o Ieriko, na o atu i lona fale e saili ia i laua. O le upu moni, ana le faalafi e Raava tagata Isaraelu nei, semanu e fasioti e le tupu o Ieriko. E taua le ola fesoasoani i so o se tagata ua puapuagatia. O Raava o le fafine o nuu ese, aua o Ieriko o le nuu na tausalaina e le Atua, ao lea ua ia faia le galuega alofa, e faasao mai tagata o le nuu o le Atua mai o latou fili.

Tamaiti, ua aoao mai foi mo tatou le taua o le galuega sa faia e lenei tina o Raava. O le poloaiga a Iosua na o faalilolilo ai nei tagata, peitai o le finagalo lava foi lea o le Atua. A lea na fai e Raava le galuega alofa ina ia aua nei iloa e le Tupu ma fitafita o Ieriko nei tagata e toalua. Na tautino e lenei tina lona talitonu ma ua na iloa mea na faia e le Atua mo Isaraelu. Na iloa e Raava e ala i le sami ulaula galuega na faia e le Atua mo Isaraelu. Le ala lea ua sili ai i manatu o Raava lona alofa i nei tagata e toalua na auina atu. E manatu Raava e manuia Isaraelu ma ua na iloa lava o le a lamatia Ieriko ona o le Atua o lo o au ma Isaraelu.

O Raava o se tina e loto fesoasoani, o se tina foi sa mata'u i le Atua. Na ia faalogo i mea na faia e le Atua, ona tupu ai lava lea o lona ola talitonu i le mana silisili ese o le Atua.

### **Uiga o Upu:**

- i) Faalilolilo : leiloa e ni tagata/ faapogisa/fenanata'i
- ii) Asaga : faailoga i le vao o mea na ui ai se tagata

### **GALUEGA FAATINO: FAATULAGAGA**

#### **Faatulaga mai le tala, i lona faasologa sa'o.**

1. Ua faatonuina e le tupu o Ieriko Raava, ina ia tuu atu ia te ia tagata na o atu i lona fale.
2. Ua tuliloa atu e tagata Ieriko ia te i laua i le ala i Ioritana.
3. Ua auina e Iosua tagata e toalua e asiasi faalilolilo i le nuu o Ieriko.
4. Ua faalafi e Raava tagata asiasi e toalua.

5. Ona la ulufale ai lea i le fale o Raava.

**Tali:** O le faasologa sa'o lenei - 3, 5, 1, 4, 2.

**PESE:**

O le a o tama toalua e faatamilo  
 Faatamilo i le aai o Ieriko  
 Faataamilo faalilolilo  
 Ua na e Raava  
 Toe ui atu i le vao o Ioritana

Ua o atu o fitafita o Ieriko  
 Fiu e saili saili ai lava e le toe maua

Ao Raava ua le tautala

O le Atua ua na tatala


O manuia i le aiga o Raava.....*(fati: O le a alu le laina tama faatamilo..)*

**A'OA'OGA:**

1. Alofa i so o se tagata.
2. E manaomia lo tatou galulue faatasi.
3. Tatou lavea'i i e o manaomia la tatou fesoasoani.



## UA FAALAFI E RAAVA TAGATA ISRAELU



\*\*\*\*\*

**MANATU TAIALA O IUNI : POTO MAI LE ATUA**

O le poto, o le meaalofa a le Atua i le tagata. E finagalo foi le Atua, ia fa'aaoga lelei e le tagata ua na maua le poto, e atia'e ai aiga, nuu aemaise lava i le galuega a le Atua. Peitai, a faatalalē i ai le tagata, ona toe aveeseina ai lea o lea meaalofa a le Alii, ae tuuina atu i se tasi ua ia loto i ai.

**ASO SA:** 6 IUNI 2021

**MATAUPU:** TAGATA POTO MA LE TAGATA VALEA

**SINI:** Ia malamalama le vasega, o le tagata poto, na te faia le finagalo o le Atua, a o le lē faalogo ma faia lona finagalo, o le tagata valea lea.

**TUSI FAITAU:** Mataio 7: 24 – 27

**FESOASOANI MO FAIAOGA:**

O le taeao lenei o le a tatou talanoa i le tagata poto ma le tagata valea. Faimai le upu e masani ona tatou faalogo ai...*O le tama poto e a???.Ao le tama valea e a??nai fesili e amata ai le mataupu..*Ioe o le tama poto e fiafia ai le Tama, ao le tama valea e faanoanoa ai le tina...O le eseese lona o le tagata poto ma le tagata valea. Ao le tatou tala i lenei taeao, o le a tatou talanoa i mea e faatusa i ai le tagata poto ma le tagata valea.

O le tagata poto ua faatusaina i le tagata ua fau lona fale i luga o le papa, ona to mai lea o uaga, ua oo mai foi tafega, ua agi mai foi o matagi ua pesi mai i lea fale ae lei pau lava ia, aua ua faavaeina i luga o le papa. Ua faapena le tagata e faalogo i upu a Iesu ma faia lona finagalo. O lona uiga o le tagata poto e faalogo ma usitai. O le tagata valea ua faatusaina i le tagata ua fau lona fale i luga o le oneone, ona to mai lea o uaga, ua oo mai foi tafega, ua agi mai foi o matagi ua pesi mai i lea fale ona pau ai lea, ua nutipalaina lava. Ua faapena le tagata e faalogo ae le usitai i upu ua fetalai mai ai le Alii. O lona uiga o le tagata valea, o le tagata lea e le usitai.

O le poto moni lea i le vaai faa-Kerisiano, ua faasino mai e Iesu mo tatou uma. O le faalogo ma faia, faalogo ma faatino, po o le faalogo ma usitai. O le faavae mautu lona o le tagata e mulimuli ia Iesu, so o se tagata e ave ma so'o faamaoni o Iesu, o le so'o lona e faalogo ma faatino lona finagalo. Auā a oo mai tofotofoga o le ola, e lē mafai ona toilalo ai pe afaina ai. Aisea? Auā o lo o tumau ia Keriso lona ola. O lo o mautu ia Iesu le faavae papa o lona ola. A ua ia faatusaina le tagata valea, o le na te le faia lona finagalo. Ua na ona faalogo, ae na te le faia lona finagalo. Ua na ona faalogo i le finagalo o le Atua, ae le savali ma ola ai.

O se aoaoga foi lona mo tatou le fanau, e taua lo tatou faalogo ma usitai aua e ta'ua ai tatou o tagata popoto. O le faalogo foi ma usitai o ala ia e manuia ai le ola o soo se tamaitiiti.O ai la seisi o tatou e fia ave ma tagata valea?/Ioe tamaiti tatou te mananao uma ia manuia o tatou ola...Ia manuia tele outou le fanau.



**GALUEGA FAATINO: FETUFAAIGA**

- Ia fetufaai ma le vasega, e faatatau i le eseese o le tagata poto ma le tagata valea mai le faataoto sa faamtalaina
- Ia faasoa i tamaiti le poto faa le Atua e ala i le usitai ma faalogo
- Manatua, e i ai le ituaiga poto foi lea , poto e fai mea leaga, po o le poto e fai togafiti. Ia malamalama le fanau, e le lelei lena ituaiga poto.

**PESE: TAGATA POTO**

Tagata poto na fau lona fale i luga le papa x3  
 Ona to mai lea o uaga  
 Ua to mai le timu ua sau foi le tafex3  
 Ae lei pau lava lona fale

Tagata valea na fau lona fale oneone x3  
 Ona to mai lea o uaga  
 Ua to mai le timu ua sau foi le tafe x3  
 Ona pau ai lea o lona fale

**A'OA'OGA:**

1. E taua le poto i le olaga o le tagata, pe a fa'aaoga lelei.
2. Faalogo ma faia le finagalo o le Atua.
3. Ia alo ese mai leaga o le ola.

\*\*\*\*\*

**ASO SA:** 13 IUNI 2021

**MATAUPU:** O OFU TAU

**SINI:** Ia malamalama le vasega, o ofu tau sili o le ola faalogo ma usitai i le Atua e manaomia tatou te oofu ai i le taua o le ola aoaoina.

**TUSI FAITAU:** 1 Samuelu 17: 38 – 40

**FESOASOANI MO FAIAOGA:**

Ua sauni Tavita e tau ma Koliata le toa mai Filisitia, ona faaofu ai lea e Saulo ia te ia i ona ofu. Ua faapulou ia te ia i le pulou apa memea ma faaofu i le ufifatafata uamea. Na fusi foi e Tavita o le pelu i luga o ona ofu, ona faataitai lea i ai. Peitai, na te lei mafai ona tauaveina, aua e le masani ai. O lea na ia tuueseina ai nei mea uma mai ia Saulo.

Ua ia ave i lona tootoo, ma ua filifili foi i maa lamolemole e lima mai le alia, ona tuu lea i totonu o lana ato leoleo mamoe (taga), faatasi ai ma le ma’ata i lona lima. O auupega masani lava ia a Tavita faaleoleo mamoe, sa ia fa’aaogaina i le la fetauiga ma le fili o Koliata. O le taunuuga o lenei tala tamaiti, na manumalo Tavita ina ua ia faatoilaloina le toa lenei mai Filisitia.

Tamaiti, o le poto o le filifiliga a Tavita, i lona fa’aaogaina o mea sa masani ona leoleo mamoe ai, na mafua ai ona manumalo. Aisea? Auā sa ia te ia le Atua. Ai ana faapea na te fa’aaogaina ofu tau o Saulo, semanu e faatoilaloina o ia e Koliata.

Va’ava’ai foi tatou le fanau ia Tavita, na alu lava o ia ma le mautinoa e auai mai le Atua. Aisea? Aua e i ai le Atua i mea uma, tatou te i ai. O le isi itu e pei ona taua i le tala, o le ola faamasani i mea ua masani ai le soifua. O le uiga o le manatu, ‘aua le faamasani o tatou tagata i mea e le’i masani muamua iai; pei ona iai ofu tau o Saulo sa ia faa ofuina ai Tavita. O le a le tali a Tavita “Ou te le mafai ona alu ma nei mea , aua ou te lei masani ai”

A’o a mea ua masani ai Tavita? Masani lava Tavita i ana mea tau e faaaoga i aso uma. O ofu tau o le ola tatalo, o ofu tau o le faamoemoe ma le faatuatua i le Atua; ona fa’aeaina ai lava lea o i tatou. O le upu moni, na tau le Atua ma Tavita na mafua ai ona manumalo. Ioe, e le manumalo se tagata tau, pe afai e faalagolago ua na o lana tao ma le pelu, e aunoa ma le faamoemoe i le Atua.

Tamataitai, e i ai taimi tatou te manatu maualuga i le isi au uo poo le isi ou uso a tagata. Taimi foi ia tatou te manatu ai lava na’o i tatou lava, ua galo ai ia i tatou le Atua.. Manatua o Iesu la tatou uo sili, na afio mai e faia le faaolataga mo le lalolagi agasala, e lei mafaia e le oti ona faatoilaloina aua ua ia te ia le ofutau o le manumalo ina ua toetu manumalo mai le oti ma le tuugamau.

**Uiga o Upu:**

- i) Puloutau uamea pulou faapitoa e uamea e faaaoga i taua
- ii) Ufifatafata uamea: o le ufi uma ei luma o le fatafata/ufiufi o le fatafata

**GALUEGA FAATINO: TALI FESILI NEI**

- 1. O ai e ana ofu tau na faataitai e Tavita?
- 2. Aisea na lē manao ai Tavita i ofu tau?
- 3. “Ou te le mafai ona alu ma nei mea, aua ou te le i masani ai.” O ai e ana upu ia?
- 4. O a mea na fa’aaoga e Tavita e tau ai?
- 5. O ai le igoa o le toa na tau maTavita, a’o fea foi e sau ai?

**PESE: UA NA O SI TAMA O TAVITA**

Ua na o si tama o Tavita  
 Na alu i le alia  
 Ua na o si tama o Tavita  
 Na alu ma maa e lima  
 Tasi le maa, tuu i le maata  
 Maata ua liai, ua liai  
 Tasi le maa tuu i le Atua  
 Ona pau ai lea o le Toa.

**A’OA’OGA:**

- 1. O le tagata poto, e iloa i ana faaiuga sa’o e fai.
- 2. Filifili i le manuia ae le o le malaia.
- 3. Faalagolago i le Atua, e manumalo mai ai i faaososoga.

**UA FA'AOFU E SAULO TAVITA I ONA OFU TAU**



\*\*\*\*\*

**ASO SA:** 20 Iuni 2021

**MATAUPU:** **E MANUIA LE TAGATA POTO**

**SINI:** Ia malamalama le vasega i le olaga manuia o se tagata, pe a foai ai e le Atua le poto.

**TUSI FAITAU:** Faataoto 3: 13 – 20

**FESOASOANI MO FAIAOGA:**

O le tatou tusi sa faitauina tamaiti, o upu ia a le poto o Solomoa. O lo o ia faa-amuia ai i le tagata na te maua le poto ma le mafaufau. E sili lona tau i lo le auro ma le ario. I se isi ona faaupuga faigofie, e sili atu lona taua ma le aoga i lo le auro ma le ario. O le ario ma le auro o ni mea aupitosili ona taugata, saili gata foi, peitai lea faimai upu a Solomona e sili atu ai le poto i nai lo ia mea uma.

*O le tagata poto na te maua le ola tului, e faaeaina i le viiga, o ona ala, o ala matagofie o lo o i ai manuia.* O uiga ia e maua e le tagata e na te mauaina le poto, e faaeaina. Ioe tamaiti, a e maua le poto e te maua galuega lelei ma tulaga maualuluga ma le faaeaina i totonu o lou aiga, o lou nuu, o lau Ekalesia, e oo lava i totonu o le atunuu. O le tagata poto e savali i ala o le matagofie, o lona uiga o le poto e leai se mea sese e na te faia, e mafua mai i le faaiuga e faia mai i le poto o le mafaufau. O lo o i ai foi le manuia – e manuia le tagata e na te maua le poto. Aua o le poto e maua ai mea uma e manao i ai.

O le poto o le tagata na afua mai i le poto o le Atua na ia faavaeina ai le lalolagi sa soona nunumi. Le ala lea tatou te faamatalaina ai le Atua o le Atua poto. Aua foi e leai lava se isi poto e sili atu nai le poto o le Atua pe a tatou mafaufau ma vaavaai i le matagofie o lana foafoaga paia na ia faia i le amataga.

Fanau e, o le poto o se auupega sili lea tatou te maua ai soo se mea e tatou te mananao i ai. E taua le poto salalau e pei ona tatou taumafai ai i aoaoga. Peitai o le poto lena e i ai ona itu e leaga pe a leai so tatou ola faautauta. Ao le poto moni mai le Atua o le poto lea e ala i le faalogo ma usitai, e tele manuia e maua e le tagata poto, ua ia te ia le faalogo ma usitai ma faatuatua i le Atua. O le ituaiga poto lena o lo o tautala Solomona. O le tagata ua faatumulia ona ala i le poto mai le Atua. E savali i ala o le Alii, ma tausi i ana poloaiga i aso uma. O le tagata lena na te maua le tamaoaiga i le tino, mafaufau ma le agaga, auā o lo o ia te ia le Atua....Ia aoao mai pea le Agaga o le Atua ina ia tatou maua le poto ua ia finagalo ai mo tatou..

**Uiga o Upu:**

i) **Magaala :** o galuega ma mea e fai a le tagata poto

**GALUEGA FAATINO: PASO****Saili mai upu nei:** Viiga, matagofie, amuia, Poto, manuia, mafaufau

P	E	T	M	A	N	U	I	A
O	F	S	A	L	E	M	A	I
T	R	U	F	T	E	S	M	U
O	S	O	A	V	N	O	P	M
V	T	F	U	I	N	I	T	A
E	U	O	F	I	F	T	N	V
M	A	T	A	G	O	F	I	E
R	S	M	U	A	T	P	A	U

**PESE: E TAUA LE POTO**

O le poto, e taua  
 I le olaga o le tagata  
 Leai se mea e oi ai lou loto  
 Pe a e mauaina o le poto

O le mamalu faaeaina  
 O lana tu le tamaoaiga  
 Taulealea ma lana tautua  
 Le poto lena mai anamua.....(*pese kukama*)

**A'OA'OGA:**

1. Ia faamuamua le Atua i taimi uma.
2. E sili atu manuia o le Atua nai le auro ma ario.
3. Fa'aaoga tatau avanoa lelei ua tatou maua.
4. Faalogo ma usitai i matua.

\*\*\*\*\*

**ASO SA:** 27 Iuni 2021

**MATAUPU:** **O SOLOMONA LE POTO**

**SINI:** Ia malamalama le vasega, e taua le poto e fai ai faaiuga talafeagai ina ia manuia ai nisi.

**TUSI FAITAU:** 1 Tupu 3:5 – 25 (Mo le Faiaoga)  
1 Tupu 3:7 -12 (Mo le Vasega)

### **FESOASOANI MO FAIAOGA:**

Talofa Tamaiti??O ai foi le tagata ua ta’ua o le tagata poto i le Tusi Paia...*(fesili amata)*..Ioe o Solomona lena lea e fai mai ai le tatou mataupu o lenei taeao.– Ao moe Solomona i le po i le nuu lea o Kipeona. Sa faaali ai le Atua e ala i le miti. *(O ai e masani na fai sana miti i le po.)* O le miti a Solomona fai mai na fetalai atu le Atua ia te ia *Inā fai mai ia pe se a se mea ou te avatua ia te oe.* Ona tali atu ai lea o Solomona i le Atua “.....*O lea ia e foai mai i lau auauna le loto matala ina ia faamasino e ia i lou nuu, ma ia masino ai i le lelei ma le leaga, aua po o ai na te mafaia ona faamasino i lou nei ua matua toatele lava.*”.

Na iloa lelei e Solomona e le gafatia e lona poto ma sona iloa ona faatonutonu ma faamasino i le nuu ona o le toatele naua. Le ala lea na ia manao ai i le Atua ina ia aumaia le poto poo le loto matala e faia ai lana galuega faa-taitai. Na malie i le faalogo a le Atua le upu na fai atu ai Solomona. Fetalai le Atua ia Solomona pe aisea ua le ole atu ai i le ola tului ma le tamaoiga, a ua ole atu lava ina ia maua le poto. O le manatu o Solomona na ia fia maua ai le poto, e le o sona fia tautaua po o sona fia iloa, ao le poto e tausii ma faamasino ai lona nuu o Isaraelu. O lona uiga o le poto ina ia faia ai ni faaiuga sao mo le solo lelei o le nonofo o Isaraelu.

Na aumaia lava e le Atua le poto ia Solomona, sa leai foi se tasi na muamua pe mulimuli e tutusa ma le poto o le Tupu leni o Solomona. Ae lei faapea nao le poto na aumaia e le Atua ia Solomona, na aumai ai foi ma le oloa taua ma le mamalu.

Ua aoao mai foi ia i tatou le fanau, faapei ona ole atu o Solomona i le Atua ina ia maua le poto, e faapena foi tatou – Ia tatou tatalo i le Atua e foai mai le poto i ai tatou, e leo se poto e tatou te mitamita ma faalialia vale ai. Ao le poto ina tatou faia ai mea lelei aua le lumanai manuia o nai o tatou aiga. Ia o faatasi foi la tatou tatalo ina ia aumai le poto, ma a tatou galuega faatino e ala lea i le toaaga e fai meaaoga ma susesue. O auala na e tali mai ai le Atua ia i tatou.....

### **Uiga o Upu:**

- i) E le masino : toatele naua
- ii) Loto matala : poto

**GALUEGA FAATINO:** Toe faatulaga mai upu o lo o i lalo i le tusiga sa'o

Sinoamafa, faitmaaulia, atogafa, topo, tolo tamala.

**TALI :** faamasino, mafaitaulia, faatoga, loto matala.

**PESE: SOLOMONA LE POTO**

(Solomona x2 o le poto) x3  
 Na foaiina mai e le Atua  
 Solomona o le Tupu Israelu  
 Israelu toatele o le nuu  
 O le nuu agasala o le Atua  
 Faamasinoina e le Atua.....(*fati : ponaiivi mamago....*)

**A'OA'OGA:**

1. E faaeaina i tatou e le poto
2. Ia poto ma faautauta
3. O le poto, o le meaalofo a le Atua e faia ai faaiuga talafeagai.

\*\*\*\*\*



## **MANATU TAIALA O IULAI : IA MATAALA**

O le ola mataala o se tasi o tu faa-kerisiano e tatau i soo se Kerisiano. E le gata foi lea e taua foi i le olaga o aso faisoo. Ua taialaina ai manatu o lenei masina, ina ia aoaoina ai le fanau ina ia mataala. Leaga o le olaga nei ua tele faaoosoosoga mea ua tutupu e afaina ai le ola taumafai i le poto salalau o le fanau.

**ASO SA:** 4 Iulai 2021

**MATAUPU:** **UA MIMITA ESEKIA**

**SINI:** Ia malamalama le vasega o le mimita tele o le tupu o Esekia na i'u ai i le malaia lana taitaiga.

**TUSI FAITAU:** Isaia 39: 1-8

### **FESOASOANI MO FAIAOGA:**

O le mimita e faamatalaina ai le tagata ua ova le fiafia, ma ua leai se tapulaa e gata mai ai. Ao se faatinoga foi e iai ona tua. A le i'u lelei, e i'u leaga. Ao lagona foi ia e le fito i tonu i se tagata se toatasi poo ni tamaiti. Ua oo lava foi i tagata matutua ua aafia ai ma i latou. O lea lava foi e pei ona tatou faalogoina ma molimauina i nei ona po. A ova le fiafia o le tagata ua oti, ae a ova foi le fiafia ua le taofia le lima foa'i.

E foliga faapea ni lagona o loo tutupu i totonu o le tala sa tatou faitauina mai le tusi a Isaia. O le molimau a le perofeta i tulaga ogaoga na oo i ai le tamaoiga o le tupu o Esekia ma le malo o Iuta, ina ua leai se faautauta.

Fai mai ua faailoa e Esekia mea uma o lona malō, malumalu ma lona tamaoiga ia Papelonia ma ana avefeau. O le faailoga o le talia o Papelonia ma ana au, ma ana tapuaiga, ma ona tagata, ma ona atua e Esekia ma Iuta. Ua ia faatuatua le alofa o le Atua na tu i matagi olo o la latou folauga. Ua vave ona galo ia Esekia le Atua na faaola ia te ia ma lona mai, ma Iuta mai le matamata ita o Asuria. Ao lele ua tosina atu i le malosi faafitafita ma le maemaea o Papelonia. Se tupu inā faavalevlea ma faigofie, se tofā inā papau ma avaga gofie i le malosi faaletagata ma le vaai o mata.

Lea ua folafola ai e le Atua e ala ia Isaia lana perofeta, o le a olopalaina oe e Papelonia ao e matamata iai. O le a aveia oe faatagata o taua ma ou atalii. O le a aveina uma e Papelonia o mea uma sa e faaali atu i ai, o oloa ma le tamaoiga e oo lava i tagata. O ou atalii e fai ma eunuka i Papelonia.

Le perofeta o Isaia o loo faatino pea lona valaauina ma le faamaoni. O Isaia foi o le Isaraelu ma le Sa Iuta, e lei faigofie le finagalo momoli mai o le Atua mo lona foi nuu. Ae na fai lava le tiute ma le matafaioi a Isaia tusa lava pe tigā le feau mo Iuta o lona foi nuu. Le perofeta faamaoni ma atamai. Tumau ma faatuatua pea i le Atua. Ao Esekia lava o le tupu e lē tumau ma mau le toovae o le ola faatuatua.

O le tagata e atamai, faamaoni ma tumau i le Atua ma lona valaauina e faamanuia iai le Atua. Ae o le tagata femoumuai, ma mimita e feagai ma faigata o le olaga.


O se faamanatu foi lea mo i tatou le fanau, ia tatou faaeteete ia tatou faatinoga fai i lea aso ma lea aso. O le isi tamaititi a ova le mimita, ua fanau mai ai le lē usitai i matua. Ao lena le usitai, iu lava ina afaina ai ma le ola. Tatou vaavaai i lenei vaitau, tele tamaiti ua maua le potu ma ua avea ma ala e mimita ai ma fai lava le mea la e manao iai lona loto. O fea e i'u iai? A le i'u lelei le aoga ma le ola taumafai, e fetaua'ina mai foi ua maleo i le vai, ia poo ua lavea foi se taavale. O lea la le fanau e, ia o tatou faaeteete mai lagona mimita. Aua o lea ua tatou iloa ma aaoaina mai le tala sa tatou faitauina, e leai se mea aoga e maua mai ai. Manuia tele outou le fanau.

### Uiga o Upu:

- i) Eunuka - O le auauna poo le tagata tautu uaina a le tupu  
 ii) Auupega - O mea tau e fa'aaoga i le taua.

### GALUEGA FAATINO: FAAFETAUIGA O UPU

Faafetaui upu nei i o latou upu uiga tutusa.



### PESE: SO BE CAREFUL LITTLE EYES

So be careful little eyes what you see x2  
 For the father up above is looking down on us.  
**So be careful little eyes what you see**

So be careful little ears what you hear x2  
 For the father up above is looking down on us  
**So be careful little ears what you hear**


So be careful little mouth what you say x2  
 For the father up above is looking down on us  
**So be careful little mouth what you say.**

So be careful little mind what you think x2  
For the father up above is looking down on us  
**So be careful little mind what you think.**

**A'OA'OGA:**

1. E lē lelei le ola mimita.
2. Ia manatua le alofa o le Atua ia te oe.
3. Ia faautauta i au faaiuga fai.

**UA FA'AALI E ESEKIA LONA FALE**



\*\*\*\*\*

**ASO SA:** 11 Iulai 2021

**MATAUPU:** **AU SOO FAATUATUA ITIITI**

**SINI:** Ia malamalama le vasega e tofotofoina lo tatou faatuatua i taimi uma.

**TUSI FAITAU:** Mataio 8: 23-27

**FESOASOANI MO FAIAOGA:**

O le faatuatua o le faamoemoe ma faalagolago lea i mea e le o vaai atu iai. O se matūpalapala foi e iloa ai le tagata ua talitonu ma le loto atoa ia Iesu Keriso ma le tala i le faaolataga na afio mai ai. Peitai o le natura lava ia o le tagata e feagai loa ma faigata ma fita o le ala, ona vave lava lea ona poia i le fefe ma le lē mautonu. Ma tauau ai ina mou atu le ola faatuatua ma le talitonu ia Iesu Keriso ma le talalelei.

E foliga faapea ni lagona o loo tutupu i le au soo tala sa tatou faituaina mai le Evagelia a Mataio. O le au soo ua iloa lo latou matūpalapala ua iloa ai e tagata lautele. O le au faatuatua ia Iesu Keriso. Peitai o lea lava ua fa'aali manino lo latou faatuatua itiiti.

Le tulaga tonu a lea o loo ua fa'afesagaa'i nei ma le au soo. O le taimi lava na amata ai le folauga, ma ua see le vaa agai atu leisi itu, o le taimi foi lena na tofa ai le Alii. Ua mapu teisi ane sei fai se malologa aua ua lagona le vaivai ma le lelava i lana galuega talai i le aso atoa. E le taumate sa iai se lagona faamaualuga o le au soo, o se malaga to'amalie ma filemu, aua foi, o lea e malaga ai ma Iesu. Peitai, na matua faateia i latou ina ua to ifo le afa i le vai, ua osofia lo latou vaa e peau, ma toetoe a goto; ao loo tofa pea le Alii i le taumuli o le vaa.

Talofa i le au soo, ua matua aliali lava lo latou vaivai ma le faatauavaa, ina ua feagai ma le afa. A lea ua fememeai ma ua le mautonu. Ua popole foi ma ua atuatuavale, aua foi, o le oti ma le tuugamau i le vasa lea e vaai atu iai.

Ae afai ua lagona le popole ma le atuatuavale, ua sala ina lagona, aua foi, ua nao i latou o ni soo. Peitai e le tatau i soo o le Alii ona fefe ma faatuatua itiiti, aua o lea o loo malaga ma le taitai malaga o Iesu.

Ui o lea, e le mafai lava ona tatou suia o tatou uiga ma o tatou natura faa-le-tagata. O le taimi lava e afatia ai le malaga ma tutaia ai le folauga, o le taimi foi lea e sola ai ma le faatuatua, ae tulai ae le fefe ma le palaai, o le taimi foi lea e aliali ae ai le popole ma le atuatuavale, aua ua gata lava la tatou vaai fita ma faigata ae galo ai le alofa laveai o le Atua, o loo taoto i totonu o ia mea uma.

Fai mai ua fafagu i le Alii, "Le Alii e, le Alii e, o le a matou fano." O le taualaga ma le ausulusulu a le tagata ua tumu i le palaai; ua latou mautinoa e toe o Iesu Keriso lo latou faamoemoe.

Ona tu lea o ia, ua vavao atu i le matagi ma peau o le vai; ona mavae ai lea ma malū. Sa galo i manatu o le au soo e mafai e Iesu ona vavao i le matagi ma le vai; lea e mafua ai ona taufaiofo ma latou fesili ane, *Pe se a le uiga o lenei tagata, aua ua usiusitai ia te ia le matgai ma le vai.*

Talofa e, ua leva ona mafuta ma le Alii ae le toe au iloa lava le Alii. Ua tele foi vavega ma faamalologa a Iesu na fai ae le toe au iloa o le Alii o Ia.

O loo vaivai pea le ola faa-le-faatuatua o le au soo ma lo latou ola ofoina mo le Alii ma lana galuega talai. A lea ua fesili Iesu, “*Se a le mea tou te matatau ai, outou o e faatuatua itiiti?*”

Le fanau e i lenei taeao, o le faamalosi lea a le tatou mataupu mo i tatou. O le ola talitonu ma le faatuatua i le Atua, o le faavae na o manuia tatou te maua. Aua tatou te faapei o le au soo, e mulimuli ma matamata i vavega ma faamalologa a le Iesu Keriso, ae o loo ola masalosalo pea. Tatou feagai ai ma aoaoga i lenei vaitau, o le faamanatu, e o lua lou faatuatua ma au meaaoga e manuia ai lou faamoemoe.

### Uiga o Upu:

- i) to mai - agi mai le matagi
- ii) osofia - osofa'i

### GALUEGA FAATINO: Taliga fesili

1. O a ni lagona o le au soo ao lei alu le malaga?

**Tali.** Sa lagona le fiasia ona o loo malaga faatasi ma Iesu.

2. O a fetalaiga a Iesu Keriso na fai i ona au soo?

**Tali.** Se a le mea tou te matatau ai, outou o e faatuatua itiiti?

3. O a ni lagona o le au soo ina ua usiusitai le matagi ma le vai ia Iesu?

**Tali.** Sa lagona le matatau ma le ofo tele.

### PESE: Iesu o le Alii o Matagi ma Afa

E faapenei na alo le vaa, alo vaa, alo le vaa  
 E faapenei na alo le vaa i le vai o Kalilaia  
 E faapenei na moe Iesu, moe Iesu, moe Iesu  
 E faapenei na moe Iesu i le vaa i Kalilaia  
 E faapenei na fati o galu tetele, galu tetele, galu tetele  
 E faapenei na fati o galu tetele, i le afa i Kalilaia  
 E faapenei na fafagu Iesu, fafagu Iesu, fafagu Iesu  
 E faapenei na fafagu Iesu e ona soo i Kalilaia  
 E faapenei na taofi le afa, taofi le afa, taofi le afa  
 E faapenei na taofi le afa e Iesu i Kalilaia.

### A'OA'OGA:

1. O Iesu le taitai malaga.
2. Lototele ma faatuatua i le Atua e manuia ai se faamoemoe.
3. Ia manatua le alofa o Iesu Keriso i taimi uma.

# UA VAVAO E IESU LE MATAGI



\*\*\*\*\*

**ASO SA:** 18 Iulai 2021

**MATAUPU:** **O TAUPOU MATAALA**

**SINI:** Ia malamalama le vasega o le mataala i taimi uma e manuia lona taunuuga.

**TUSI FAITAU:** Mataio 25: 1-13

**FESOASOANI MO FAIAOGA:**

Tamaiti o le upu mataala, e faamatalaina ai se tagata e ola tapenapena i soo se taimi. O loo fausia mai foi i ni upu se lua, o le upu *mata* ma le upu *ala*. O lona uiga e ala mata i taimi uma. O le faanaunautauga lava ia, ina ia iloa ma malamalama i se faatinoga o le a tupu.

E foliga faapena se lagona o loo faamatalaina e le tala sa tatou faitauina mai le evagelia a Mataio. O taupou mataala ma ola tapenapena, ua faaigoaina o taupou popoto; ao isi taupou e toalima ua faatamala ua faaigoaina nei o taupou vālea.

O nei taupou toasefulu sa o uma lava e faafetai’ ai i le faatoafaiavā. O taupou popoto e toalima ua latou ave i a latou molī faatasi ma latou fagu suauu. Ao le isi toalima vālea ua latou ave na o latou molī ae leai ni suauu. Ua tuai ona taunuu mai le faatoafaiava, ona taufaitulimomoe ai lea o i latou uma.

Peitai o le tulua o po, na faateia ai i latou ina ua sau le alaga ua faapea mai, Faauta, ua sau le faatoafaiavā; inā o ia outou e faafetaiai ia te ia. Ua tau fai tutu i latou i luga ua teuteu ia a latou molī. O i tonu na iloa ai e i latou o taupou valea ua lata ina fai ifo le mumū a latou molī, ona latou faatoaga atu lea i taupou popoto ma le mataala e toalima ina ia aumai ni a latou suauu ma latou ona o le a pepē a latou molī. Peitai sa le mafafai taupou popoto ma le mataala, ua latou tali atu i ai, e latou te le lava; ae lelei ona latou o e faatau mai i a latou suasuu.

E lei fano lava ona o atu i latou e faatau mai ni a latou suauu, ae toaitaunuu mai loa ma le faatoafaiavā. Ua faaulufale foi e le faatoafaiavā o ē sa nonofo ma sauniuni mo lona afio mai. Ua latou ulufale i totonu mo le tausamaaga ona tapuni ai lona lea o le faitotoa. E mulimuli ane ona taliu ane lea o le toalima valea ma latou suauu ma molī. Ua latou augani foi i le Pule ina ia ta tatala atu le puipui mo i latou. A ua tali atu o ia, ou te fai atu ia te outou, ou te le iloa outou. O lea, ia outou mataala ai, auā tout e le iloa le aso po o le itu aso e sau ai le Atalii o le tagata.

O lea foi se toe faamanatu mo i tatou le fanau i lenei taeao, ia tatou mataala i taimi uma. Aua tatou te ola faasamasamanoa e pei o taupou valea e toalima lea na toe apatā ane ae ua tuai. Ae lelei ona tatou tapenapena i soo se taimi.

Ao tatou feagai ai ma aoga i lenei tausaga, e taua lou faamaoni e fai au meaaoga i taimi uma, aua tatou te leiloa pe tei a ua usu atu le faiaoga faapea atu o le a fai se tatou suega faamanatu i tatou mataupu ia ua tuanai a o la e saunia. Ia faamanuia tele le Atua ia te outou le fanau.

**Uiga o Upu:**

- i) Tulua o po - leva le po
- ii) Faatoafaiavā - faatoa fai le toalua



iii) Mamate - pepē

**GALUEGA FAATINO: Paso**

F	T	G	F	Y	G	H	Y	G	F	U	K	O
Y	U	E	A	C	V	B	M	M	K	L	Y	U
S	S	E	A	L	O	I	O	P	U	T	I	U
F	R	T	T	A	U	P	L	U	H	E	E	P
C	F	Y	O	U	H	K	I	H	G	W	F	O
Q	A	M	A	M	A	T	E	U	F	A	R	P
W	S	U	F	D	E	A	L	T	R	S	T	O
A	A	B	A	F	A	F	J	Y	D	M	G	T
S	S	N	I	G	V	U	H	R	F	N	H	O
L	A	M	A	H	E	U	G	G	R	B	Y	F
I	G	K	V	B	S	A	F	V	A	L	E	A
J	U	L	A	T	T	U	B	H	T	G	J	L
H	I	P	I	U	O	S	P	J	O	T	I	I

**Saili mai upu nei:**

1. Fa'atoafaiavā
2. Mamāte
3. Moli
4. Popoto
5. Valea
6. Suau'u

**PESE: FAAUTA**

Faauta! Faauta!

Ou te tu i le faitotoa ma ou tu'itu'i atu,

O se tama fa'alogo i lo'u leo,

Poo se teine fa'alogo i lo'u leo

Ina tatala mai ia, tatala, tatala lou agaga ou te fia ulufale atu ai.

**A'OA'OGA:**

1. E tāua le ola tapenapena i taimi uma.
2. Aua le ola fa'atamala
3. Mataala mai i faaosoosoga.

# O TAUPOU MATAALA



\*\*\*\*\*

**ASO SA:** 25 Iulai 2021

**MATAUPU:** **AUA LE TUSITUSILIMA**

**SINI:** Ia malamalama le vasega o le ola tusitusilima e le o mea faatinoga lelei, aua o le tusitusilima e uiga tutusa ma lou tua'ia o le leaga i le isi ou uso.

**TUSI FAITAU:** Mataio 7: 1-6

**FESOASOANI MO FAIAOGA:**

O le tasi nei o amio ua masani ai nisi tagata. O le ola tusitusilima ia poo le ola faamasinosino lava lea. O ni uiga o loo atagia ai le ola faafiaamionu i luma o le vaaiga a isi tagata. Ae ua galo ai ona suesue muamua ia te ia ma lona lotoifale poo faapei i mai lona agaiga.

E foliga faapea se vaaiga o loo alia'e mai le tala sa tatou faitauina. O nisi o upu o le lauga fa'aumiumi a Iesu i luga o le mauga, ua ia faamanatu ai i lona au soo ma le au faalogologo i lea taimi, le leaga o le tagata e ola faafiaamionu, ua ia manatu ane o ia ua sa'o ma atoatoa lana amio ao le isi e leai. Ao nisi ia o uiga ua mafi ai tele le toatele o faresaio ma le au tusiupu. Ua fai ma latou amio le sailiili masei ma le ola faufau leaga. Ae faatitino lava a latou faiga ia, i tagata vaivai ma le ola taotaomia o le sosaiete.

Peitai lea lava ua manino fetalaiga a le Alii Faaola ua ia a'oa'o mai ai. Ia e muai suesue muamua lava oe ia te oe lava, pe o faapei mai lou ola talitonu ma lou ola faatuatua i le Atua, ae aua e te fesiligia fua le ola talitonu ma le faatuatua o le isi.

O le upu 'utupoto' lea o loo faaogaina e Iesu Keriso i totonu o le tala. O le ata faa-faatusa ua faatusaina ai e Iesu Keriso le telē o le faaletonu po'o o le agasala o loo nofo ma le tagata faafiaamionu, ao lenei ua nofo ma faamasino fua faaletonu o isi.

Ae mo le utupoto lava ia ma lona uiga, o se laau telē e faalava i luga o amo pou o se fale Samoa. O lenei laau e le gata o le telē, ae toe mamafa foi. A fua la i lona faaogaina ma lona faatusa o loo fua iai. O lona uiga, e le gata o le telē le faaletonu ae toe mamafa foi le aveaga o le agasala.

I le finagalo o le Alii Faaola, aua e te fesiligia fua e oe agasala ma faaletonu o nisi. Ao o oe, le isi tagata au pito i sili ona tele le faaletonu o e nofo ma oe.

Le fanau e, o le faamanatu foi na a le tatou mataupu i lenei taeao. Aua e te alu fua fai tala o le isi tamaititi. Faapea mai, o le tamaititi le la e ese le paie e fai meaaoga, o le tamaititi lale o le aivalea ia, e le iloa fai le faatele, e le iloa faitau se tusi.

Tamaiti 'a'ua. Ia tou manatua fetalaiga a le Alii Faaola lea ua aoao mai ai ia te i tatou. Ia tatou mafua'au muamua tatou i o tatou faaletonu. Aua o le mea mautinoa lava tamaiti, o tatou uma lava e leai se isi e atoato. Tatou te agasala uma lava i le silafaga a le Atua.

Mafuaaga na sa afio mai Iesu Keriso i le lalolagi, e maliu, ma toe Soifua manumalo mai le oti ma le tuugamau, ina ia faamagalo o tatou agasala uma.

**Uiga o Upu:**

- i) Utupoto - o le laau faalava i luga o pou o le fale.  
 ii) Euese - aveese  
 iii) Tusitusilima - tau tuua'i le leaga i isi.

**GALUEGA FAATINO: Paso**

F	T	G	F	Y	G	H	Y	G	F	U	K	O
Y	U	E	A	C	V	B	M	M	K	L	Y	A
F	T	A	F	I	A	A	M	I	U	T	I	M
F	U	T	E	A	U	F	L	U	H	E	E	I
C	P	Y	U	U	H	A	I	H	G	W	F	O
Q	O	M	E	M	A	A	E	U	F	A	R	T
W	T	U	S	D	E	M	A	T	A	S	T	O
A	O	B	E	F	A	A	J	Y	S	M	G	N
S	S	N	M	G	V	S	H	R	I	N	H	U
L	A	M	O	H	E	I	G	G	L	B	Y	F
I	G	K	V	B	S	N	F	V	A	L	E	A
J	U	L	A	T	T	O	B	H	A	G	J	L
H	I	P	I	U	O	S	P	J	U	T	I	I

**Saili mai upu nei:**

1. Fa'amasino
2. Mata
3. Fasi Laau
4. Amiotonu
5. Utupoto
6. Euese

**PESE: AUA LE TUSITUSILIMA**

Aua le tusitusilima  
 Aua le faamaualuga  
 E le fiafia, ai e Iesu  
 A ia tumau le ffilemu.

Ia maua a le loto alofa  
 Ia loto faamagalo  
 E fiafia ai Iesu  
 A ia tatou tumau le filemu.....(*fati: Fai sau tatalo i le taeao*)

**A'OA'OGA:**

1. Aua le ola faamaualuga.
2. E le lelei le tusitusilima
3. Aua le faafiaamiotonu.

\*\*\*\*\*

## **MANATU TAIALA O AUKUSO : FAALOGO MA USITAI**

O le faalogo ma usitai o ala mautinoa ia e iu manuia ai so o se tamaitiiti. O se manatu foi lea ua 'au'au i ai mataupu o lenei masina. O le faamoemoe ina ia matua aoaoina ai le fanau ina ia faalogo ma usitai, leaga ua le toe faigofie foi fanau i lenei vaitau i le tele o suiga fou ua ofi mai.

**ASO SA:** 1 Aokuso 2021

**MATAUPU:** **UA USITAI LE UII**

**SINI:** Ia malamalama le vasega o lagona e tutupu i totonu i o tatou loto, o le galuega lena a le Agaga Paia. Le Agaga Paia lea na tuuina le salamō ma fautua i le uii e toe fo'i i lona aiga, lea na usitai i ai le uii ma fo'i loa i lona aiga.

**TUSI FAITAU:** Luka 15: 17-20

### **FESOASOANI MO FAIAOGA:**

O le upu usitai o se upu e uiga lasi lona faamatalaina. A talanoaina le usitai, ua talanoa aga'i le faalogo, o le ava i soo se tasi. E mafai foi ona talanoa i manuia e maua i tua atu o le usitai. Ao le tasi foi nei o meaalofa a le Atua mo le tagata i aso uma o lona olaga. E faatonutonu ai ma tapasaina se tagata i ni manuia oi le lumanai. E mafai foi ona faatupuina se nofo lelei ma se ola fealofani o ni tagata. Faataitaiga: A usitai le fanau i le tama ma le tina, ua manuia ma solo lelei lona olaga. A usitai foi le tagata, ua mafai ona alu ese mai faafitauli o le olaga e malaia ai.

E foliga faapea se faatinoga o loo tupu mai totonu o le tala sa tatou faitauina, e faatatau i le uii na vaeluaina iai lona tofi. Peiseai o le manao o le uii, ua fia tutoatasi ma ua fia alu ese ma le aiga.

Peitai, o le tu ma le aga faa-Eperu, e le mafai ona vaevaeina ma tufatufaina se oa a se aiga i se fanau ao soifua pea le tama o le aiga. Ae o le mea ua faia e le uii, o se tulaga e le manuia tele i le vaai faalemafaufau i ai.

A tatou mafaufau i ai i se isi itu, ua le usitai le uii i le tu ma le agaifanua faa-Eperu. Ao le ata manino foi lea o lona le usitai ma le lē ava i lona tama. Peiseai ua sopo tuaoi le atalii i lona tama. Ua leai lava vaai i le va o fanau i mātua, a ua fai lava lona loto.

Peitai e le muta le galue mai pea o le Agaga Paia na te feliiua'ina le loto ma'aa o le tagata ma lona faamaualuga. Le Agaga Paia lea na musumusuina ma tuuina mafaufauga lelei i le uii, ina ia toe fo'i ai i lona aiga. O mafaufauga la ia na faamaite e le Agaga Paia na usitai i ai le uii ma toe foi i lona tama ma lona aiga. O lona lagona ina foi o lona sese, e ala i lana tautinoga sa fai i lona tama; *“e le aoga ona toe ta'ua o ia o sona atalii, a ia ta'ua o ia o se tasi o na auauana.”* o le ata manino o le usitai ma le salamo.

Le fanau e, o le ola usitai i matua e iu manuia ai le ola taumafai, tele se aoaoga ua maua mai i le tala lea sa tatou faalogologo iai. Ua leiloa e le uii lo la va ma lona tama. Ua le usitai le uii i le tu ma le agaifanua faa-Eperu o lona le usitai lava lea i lona tama. O lona iuga foi lea na oo i ai, o le aai faatasi ma puua. Ao le ola usitai i matua ma ava i le Atua, e taunuu ai le manuia mea uma.

**Uiga o Upu:**

- i) Faulai - tele le tamaogaiga
- ii) Matelaina - fia 'ai & fia inu


**GALUEGA FAATINO: TALIGA FESILI**

1. O a ni lagona o le uii ina ua uma lona tamaogaiga?  
Tali: Ua lagona le toe fia fo'i i lona aiga.
2. E faapefea ona tatou iloa le alofa o le tama i lona atalii?  
Tali: O lana fusi ma ofo i si ona atalii.
3. O le a le tautinoga a le uii ua fai i lona tama?  
Tali: Ua ia agasala i le oi le lagi atoa ma ona luma.

**PESE:** Faalogo ma usitai**A'OA'OGA:**

1. O le ola usitai i matua e manuia ai le lumanai.
2. Ia filifili i le faaiuga sao e manuia ai.
3. Ia faataua tu ma aga la lou faasinomaga.

# UA SALAMO LE UI'I



\*\*\*\*\*

**ASO SA:** 08 Aokuso 2021 (**Aso Sa Tamā**)

**MATAUPU:** **AUA LE FEMISAA’I**

**SINI:** Ia malamalama le vasega i le lelei ma le filemu o le faaiuga na faia e Aperaamo.

**TUSI FAITAU:** Kenese 13:1-9

**FESOASOANI MO FAIAOGA:**

O le tala lea na tatou faitauina mai le feagaiga tuai, o le foi mai lea o Aperaamo ma Lota mai Aikupito. Ao le fo’i mai lea, e o mai ma le anoano’ai o le tamaoiga. Peitai, o le anoano’ai lea o le tamaoiga ua na faatupuina se fevesiaiga i totonu o le lotoifale faaleaiga. Ua avea le anoanoai o mea ua maua e le tagata ma ala ua le mafai ai ona maua se fealofaniga moni; lea lava e manino i le tala, “Ua le mafai ona la mau faatasi i le nuu, aua sa tele lava a laua mea. Ua fe’ainai ma femisaai leoleo manu a Aperaamo ma leoleo manu a Lota.”

Peitai, o ituaso pogisa o le soifuaga ma le olaga, o ituaso ia tatou te lagonaina ai le papai mai o le Agaga o le Atua, na te faatoa filemuina mea ua vevesi. Le Agaga lea na musuia Aperaamo ua afua ai le faaiuga ua ia faia. “Aua lava nei femisai i taua, poo a taua leoleo manu; aua o le uso i taua. E le o i luma ea le laueleele uma? Sei e tea ese ma au. Afai e te alu i le itu tauagavale, ona ou alu ai lea i le itu taumatau; a e alu i le itu taumatau, ona ou alu ai lea i le itu tauagavale.”

E ese le manaia o se mafutaga e ogatotonu ai le Agaga o le Atua aua foi, o le Agaga lea na te faatupuina manatu ma lagona lelei e maua ai le nofo filemu ma e ola fealofani ai tagata uma. Le lagona lea ua afua ai le manatu o Aperaamo. Afai e manatu Lota ua manaia ma lelei le itu taumatau e fai mona ma atiae ai lona aiga, ona tapena lea o ia i le itu tauagavale, ae a faapea o le itu tauagavale e manatu ai le tama, e leai se mea e leaga ai foi le itu taumatau mo ia. Pau le lagona maualuga ia maua le filemu, ia maua le fealofani i itu e lua, ona totago lauusiusi ae ai lea o le alofa, le alofa lea e mafanafana ai pea le mafutaga.

O le Agaga o le Atua e mafanafana ai mafutaga. Le Agaga lea e mafai ona faalagolago i ai le tagata vaivai e maua ai le malosi, e faamoemoe foi i ai le tagata le mautonu e maua ai le mautinoa e faaauau ai pea le tofi ma le tiute e pei ona tuulima mai e le Atua ia te ia.

O le faamanatu foi lea mo i tatou le fanau, ia solomua i tatou ona faatupu o le filemu i totonu o tatou aiga, nuu faapea ma le ekalesia. Ae le gata i lea tamaiti, ia avea foi i tatou ma tamaiti e faatupuina le filemu i totonu o aoga. Aua fai le Tusi Paia tamaiti “Amuia ē faatupuina le filemu; auā e ta’ua i latou o atalii ma afafine o le Atua.” manuia tele outou le fanau.

**GALUEGA FAATINO:** Taliga Fesili

1. O le a le faiā a Aperaamo ma Lota?
2. O fea le itu na filifili e Lota, ao fea le itu na filifili e Aperaamo?
3. Aisea ua manatu ai Aperaamo ma Lota ina ia la o eseese?



**PESE: E MANA'O IESU I LE FEALOFANI**

E manao Iesu i le fealofani  
Ia mafuta ma feuluulutai  
Aua le fevaevaeai, po o le fetuatuanai  
O Iesu lo ta puni matagi

**A'OA'OGA:**

1. E alofagia ma le tamaitiiti e faatupuina le fealofani.
2. Ia loto maulalo pei o Aperaamo.
3. Aua le femisa'i a ia tumau i le fealofani.

\*\*\*\*\*

**ASO SA:** 15 Aokuso 2021

**MATAUPU:** **UA LE USITAI ATAMU I LE ATUA**

**SINI:** Ia malamalama le vasega o le ola le usitai o Atamu na tutupu ai puapuaga ia te ia.

**TUSI FAITAU:** Kenese 3: 17-18

**FESOASOANI MO FAIAOGA:**

Na faia e le Atua le lagi ma le lalolagi ma mea o tumu ai i le amataga; ona ia muli'ai lea i le faia o le tagata i lona faatusa matagofie ma tuu i le faatoaga na te leoleoina.

Ua silasila atu le Atua ua lelei mea uma, peitai e le o maua se fiafia o Atamu. Ona faia lea e le Atua o Eva e fai ma ona fesoasoani. Ina ua uma ona faia o Eva, ona tuuina lea e le Atua o le faatoaga i Etena la te tafilisaunoa ai i le faaogaina o mea uma o i ai. Peitai, o le finagalo o le Atua, e pule i mea uma, ae sei vagana le laau e iloa ai le lelei ma le leaga, e aua la te pa'i iai.

Peitai o le vaega o le tusi lea sa tatou faitauina, o loo manino mai ai ua le usitai Atamu i le faatonuga sa tuu iai e le Atua. Fetalai le Atua, "Ua e usitai ea i le upu a lau avā, ma ua e 'ai i le laau na ou fai atu ai ia te oe, e aua e te 'ai ai."


Peitai o tua atu o le lē usitai, e fanau mai ai faigata ma puapuaga. O le tau'i foi o se faatinoga ua le manatu i le alofa mai o le Atua na faia ai o ia.

Ua toasa le Atua ona o le lē usitai o Atamu. Peitai soo se faatinoga lava e i ai lona tau'i, pei foi ona fetalai le Atua, e malaia le laueleele ona o oe, e 'ai foi ma le tiga i aso uma o lona ola. I le ma le isi, ua felatali foi le Atua o le a tutupu mai ia te ia o laau tuitui ma laau talatala, e 'ai foi i laau afu o le fanua.

O se faamanatu foi lea mo i tatou le fanau, e leai se mea sili ona faamanuiaina ai i tatou e le Atua nai loo le ola usitai i matua ma e matutua i ai tatou. Auā o tatou matua, o sui vaaia ia o le Atua i totonu o tatou aiga. La te tausia i tatou ma faapelepele i tatou, ae a oo foi ina tatou le usitai, ua sasa foi tatou ina ia o tatou iloa le mea sese lea tatou te faia. O lea le fanau, ia tatou ola usiusitai e manuia ai lo tatou ola taumafai.

**Uiga o Upu:**

- i) 'ai ma le tiga - e le maua ma se filemu se manuia.
- ii) Laau afu - laau ua faasolo ina toe tatupu pe toe ola.

**GALUEGA FAATINO: FAAFETAUIGA O UPU****Faafetaui upu i o Latou upu faafeagai?****PESE:**

O Atamu ma Eva i le faatoaga  
 Ia pule ai i mea uma lava  
 Ia faautauta i le foafoaga  
 E manuia ai lua olaga


**Tali.**

Ola laia ma le fiafia  
 O ia lava e faamanuia  
 Alofa, faamaoni ma le usitai  
 Lou tau lava mai le lagi  
 Ia foliga lava i le Atua le tagata  
 E ola i le malamalama  
 O lau amio ia tausaaafia  
 Ona maua lea o le manuia.....(*fati: Oh Mc Donald..*)

**A'OA'OGA:**

1. E manuia le ola usitai.
2. E leai se mea e lilo i le silafaga a le Atua.
3. Ia faamaoni i le Atua.

# O ATAMU MA EVA



\*\*\*\*\*

**ASO SA:** 22 Aokuso 2021

**MATAUPU:** **FILIFILIA KITIONA**

**SINI:** Ia malamalama le vasega o le filifiliga a le Atua e le faapito i se tasi, ae e avanoa tutusa ai tagata uma.

**TUSI FAITAU:** Faamasino 6: 11-18

### **FESOASOANI MO FAIAOGA:**

Sa i ai le tama e igoa ia Kitiona, o lona tama e igoa ia Ioasa o le sa Apieseru. I se tasi o aso na alu atu ai Kitiona e sasa saito i le mea e soli ai vine. Ao lo o nofo mai le agelu i lalo o le tapeneto i Ofira. Ona faapea mai ai lea o le agelu ia te ia. *“Oe lena le toa malosi, o ia te oe le Alii.”* Ona fai atu ai lea o Kitiona ia te ia *“E! le Alii e, afai ua ia te i matou le Alii, se a le mea ua oo mai ai nei mea uma ia te i matou....”* *“E lei aveina a’e ea oi tatou e le Alii mai Aikupito?”* Ioe tamaiti, ua faavaivai lava manatu o Kitiona, aua e manatu ifo lava ia o ia o se tagata faatauvaava i luma o le Atua.

Ona vaai mai ai lea o le Alii ia te ia, ma ua filifilia Kitiona e alu e tau le taua mo Isaraelu. Ua faiatu le Atua – *“Alu ia oe i lenei i lou malosi, e te laveaiina Isaraelu ai le lima o Mitiana?”* Fai mai le tali a Kitiona Tamaiti – ***E le Alii e, ou te laveaiina Isaraelu i ni a? Faauta mai, ua topito ona faatauvaava lo’u aiga i Manase; o a’u foi, o le aupito itiiti i le aiga o lo’u tamā.*** O le a le uiga o nei upu tamaiti?.....Ioe fai mai Kitiona, o ia o se tagata faatauvaava e leai sona malosi ma sona poto. O lona aiga foi, o se aiga e pito sili ona maulalo lona tulaga ma e matitiva foi i totonu o le latou nuu. Ae le gata foi i lea, o ia o le tama laitiiti o le latou aiga. Ae faimai ea le tali a le Atua tamaiti – *Auā ta te faatasi lava ma oe; e te fasia foi Mitiana, e peiseai o se tagata e toatasi.*

Ia o le tatou tala lena tamaiti. E lei avea le tulaga maulalo o le aiga o Kitiona ma ala e tuua ai le faamoemoe lelei o le Atua, mo le avea o Kitiona ma ana mea faigaluega e tau mo lona nu’u o Isaraelu. O se aoaoga foi lea mo tatou le fanau – o tatou uma o tamaiti e faatauvaava o tatou manatu ma lagona, ae ia tatou iloa lelei, e iai le faamoemoe lelei o le Atua e faaogaina ai i tatou i soo se feau i le lumanai. Ia manuia tele outou le fanau.

### **Uiga o Upu**

- i) Topito: pito sili
- ii) Tapeneto: O le laau tele

### **GALUEGA FAATINO: TALIGA FESILI**

1. O ai le igoa o le Tama o Kitiona?  
Tali. Ioasa
2. O le a le igoa o le laau sa nofo ai lalo le agelu?  
Tali. Tapeneto

3. O ai le nuu sa tau ma le autau a Kitiona?

Tali. Mitiana

4. Faamatala le aiga o Kitiona i Manase?

Tali. O se aiga au pito sili ona faatauva'a i Manase.

### **PESE: KITIONA LE TOA**

Kitiona o le toa  
 Na filifilia e le Atua  
 E na te taitai lona nuu i le manuia  
 Na ia tau o le taua  
 Faatoilalo Mitiana  
 I le malosi o le auai o le mana  
 O Kitiona o le toa  
 Na filifilia e le Atua  
 E ui ina faatauva'a ona matua .....(*fati: My God is so big*) .

### **A'OA'OGA:**

1. Filifili faatasi ma le Atua e manuia ai
2. Faamoemoe ma faalagolago i le musumusuga a le Alii
3. Tumau i le lototele, o loo lua o faatasi ma le Atua.



# O KITIONA LE TA'ITA'I 'AU



\*\*\*\*\*

**ASO SA:** 29 Aokuso 2021

**MATAUPU:** **UA USITAI NOA I LE ATUA**

**SINI:** Ia malamalama le vasega o le ola usitai o Noa na faasaoina ai o ia ma lona aiga i le lolo.

**TUSI FAITAU:** Kenese 6: 13-22

**FESOASOANI MO FAIAOGA:**

Ina ua agasala tele le tagata ma ua sopo tuoai i le va feagai ai ma le Atua. Ona tigā ai lea o le Atua ona o lana tagata na faia ma le faamoemoe, ia ola ina ia faatumauina le mamalu ma lona matagofie na amata mai ai.

Petai a oo ina le usitai le tagata ma alu ese mai le Atua; ona tuuina mai lea e le Atua se ‘aoaiga e ‘ao’ ai ai le tagata ina ia iloa ona toe fo’i i le Atua ma faia lona finagalo e faavavau. Ma o le ala tonu lea o le oo mai ai o le lolo i le lalolagi.

Ae i le vaega o le tala lea sa tatou faitauina, o le fetalaiga a le Atua ia Noa ina ia fausia se vaa mo ia ma lona aiga i le laau o le kofa. E na te faia ni ana ma na te pulutia le liu ma tua i pulu. O lona umi e tusa lea ma le tolu selau kupita, ao lona lautele e limagalulu o kupita, ao lona maualuga e tusa lea ma le tolugafulu o kupita. E na te faia foi se faamalama i le vaa, o le kupita foi na te faaumaina i luga. Na te faia foi se taitotoa o le vaa ma ni ona fogavaa o le aupito i lalo, ma lona lua ma lona tolu.

Ua finagalo ai le Atua o le a ia faaooina ifo le lolo i luga o le laueleele ma faaumatia uma ai mea ola uma o i ai; faatasi ai ma le lalolagi agasala.

Ae i le vaega faaiu o le tala lea sa tatou faitauina, o le tali lea a le Atua e tauia ai le usitai o Noa i lana faatonuga sa fai iai. E faatumauina lana feagaiga ma ia (Noa). E ulu atu o ia i le vaa ma ona atalii ma lana avā ma avā a lana fanau o ia te ia. Na te ave foi o mea ola tailua i mea uma, ina ia faaolaina faatasi ma ia. O nei manu tailua, o le manu poa ma le manu fafine, faatasi ai ma manu felele e taitasi ma lona uiga ma manu fetolofi uma o i le elelee ma lona uiga. E na te aveina foi i le vaa o ni meaai ma ia ma lona aiga faatasi ai ma mea ola uma.

Le fanau e, o le faamanatu foi lena moi tatou ao tatou iai i lenei lalolagi. E tāua lo tatou ola usitai i o tatou matua ma ē e matutua atu i ai tatou. Aua o latou ia, latou te iloa le ala tatou te manuia ai ma le ala tatou te malaia ai. I le ma le isi tamaiti, o le usitai i matua e faalevavevaina ai o tatou aso tatou te ola ai i lenei olaga.

**Uiga o Upu**

- |      |           |   |                            |
|------|-----------|---|----------------------------|
| i)   | Faaumatia | - | Fasioti                    |
| ii)  | Ana       | - | Potu e tuu ai uta a le vaa |
| iii) | Faaooina  | - | Faataunuu                  |



**GALUEGA FAATINO: TALIGA FESILI**

1. O le a le fetalaiga a le Atua ia Noa.

**Tali.** Noa ia e faia se vaa i le laau o le kofa.

2. O le a le umi o le vaa?

**Tali.** E tolu selau kupita

3. E fia le lautele o le vaa?

**Tali.** E limagafulu o kupita.


**PESE:** O ai na fau le vaa?

**A'OA'OGA:**

1. E manuia le tagata e ola usitai

2. O le usitai i matua e umi ai lou ola.

# O NOA NA FAUINA LE VA'A



\*\*\*\*\*

## MANATU TAIALA O SETEMA & OKETOPA : E ALOFA IESU I TAMAITI

Fetalai manino le Alii Faaola – *Ina tuu maia o tamaiti e omai ia te au, ae aua le vavao ia te i latou.* O tamaiti ua faatusa i ai o e o i le malo o le lagi, aua o tamaiti e mamā ma e le o i ai se agasala. Le ala lea na le teena ai e Iesu tamaiti e o atu ia te Ia. O le loto alofa o Iesu ua le gata mo tamaiti ae ua faapea foi i tagata uma latou te faia lona finagalo.

**ASO SA :** 5 Setema 2021

**MATAUPU :** GALULUE FAATASI

**SINI :** Ia malamalama le vasega e taua le galulue faatasi e tupu ai le fealofani, ma e faigofie ai foi galuega.

**TUSI FAITAU :** Roma 12:3 – 8

### FESOASOANI MO FAIAOGA:

Faatatou atu ia te outou le fanau i lenei taeao fou. O le tatou mataupu i lenei taeao - O LE GALULUE FAATASI. O le a le uiga o le galulue faatasi tamaiti? (*tuu le avanoa e aumai ai manatu o tamaiti i le uiga o le galulue faatasi, ona mulimuli ane lea faamatala e lau Susuga i le Faiaoga*). O le galulue faatasi o le tau fai galulue uma lea o tagata e faia se galuega. Faataitaiga – a ou fai atu nei tatou te o e taalao le lapiasi, o lona uiga e tatau lava ona tatou galulue uma, e le galulue isi ae nofonofo isi.

O le tusi sa faitauina o lo o faamalosi ai le Aposetolo i le Ekalesia i Roma ina ia galulue faatasi tagata uma o le Ekalesia. O le galulue faatasi e le faa sili ai le manatu o le tasi i le tasi, a ia maua uma e tagata le loto mama. E faia galuega ma le fiafia ma le felagolagomai. O lo o aumaia le ata o le tino o le tagata e eseese uma vaega e pei o vae, o lima ma isi. O nei itutino uma e tofua lava ma lona aoga. E aoga vae e savali ai, e aoga lima e fai ai feau, o mata e vaai ma taliga e faalogo. O itutino e galulue faatasi uma mo le tino e tasi.

E faapena totonu o le Ekalesia i manatu o le Aposetolo. O le ekalesia o le tino e tasi ao tagata o lo o i ai e taitasi ma lona tofiga, o itutino ia o le Ekalesia e tatau lava ona galulue faatasi e tasi ma atiae le Ekalesia. Po o le tiakono ia faia le faiva o le Tiakono, po o le aoao ia faia lona tiute faa aoao. O le faamoemoe o le Aposetolo ia galulue faatasi uma tagata o le Ekalesia ina ia maua se Ekalesia manuia ma ia tumau le Tala Lelei ia Iesu Keriso.

O se aoaoga foi lea mo tatou le fanau. Ia tatou maua le galulue faatasi ma le felagolagoma'i. Ia tatou galulue faatasi i totonu o tatou aiga, o le aoga ma soo se mea tatou faia. Aua le vaavaai fua i galuega a isi tamaiti, a ia tatou galulue lava tatou mo mea lelei.

### Uiga o Upu:

- i) Fefaafeagaiaai : tuu faafeagai
- ii) Faatatauina : faia e tusa
- iii) Matamau : lima foi

iv) Filiga :                      naunau

**GALUEGA FAATINO: Tusi mai vaega o le tino ma lona aoga?**

- Filifili e lau Susuga ni vaega o le tino e tau i tamaiti e tusi mai ni ona aoga?
- Ftt: vae, lima ma isi

**PESE:    WORK TOGETHER**

When we all work together, together, together  
 When we all work together, how happy we'll be  
 For your work is my work  
 And my work is God's work  
 When we all work together  
 How happy we'll be

Afai tatou te galulue faatasi, faatasi, faatasi  
 Afai tatou te galulue faatasi ona fiafia ai lea  
 O la'u galuega , o lau galuega  
 Tatou galulue mo le Atua  
 Afai tatou te galulue faatasi  
 Ona fiafia ai lea

**A'OA'OGA:**

1.    Ia maua le galulue faatasi
2.    Aua le galue vaavaai
3.    Ia ola fealofani

\*\*\*\*\*

**ASO SA :** 12 Setema 2021

**MATAUPU :** **O LE ANA I ENOKATI**

**SINI :** Ia malamalama le vasega – o le ana o Enokati na iloa ai le alofa faamagalo o Tavita ia Saulo.

**TUSI FAITAU :** 1 Samuelu 24:1 -7

**FESOASOANI MO FAIAOGA :**

Ina ua foi mai Saulo ina ua uma ona tulia le nuu o Filisitia, na ta’u atu ai e tagata, o Tavita o lo o lafi i le vao o Enokati. O le taimi lea tamaiti, o lo o saili pea e Saulo Tavita ina ia fasioti ia te ia. Ua faapotopoto nei e Saulo ana fitafita e tolu afe ua filifilia mai ia Isaraelu uma, ma latou o atu loa i le vao e saili le mea o i ai Tavita. Ua oo atu i latou i le lotoa mamoe i le ala, o le nofoaga lea o lo o i ai foi le ana. Ona alu ai lea o Saulo i totonu o le ana e **ufiufi ona vae**. E alu atu Saulo i totonu o le ana, o lo o nonofo ai Tavita ma ona tagata i le muliana, poo le pito i tua o le ana. Ona fai atu ai lea o tagata sa nonofo ma Tavita. *Faauta o le aso lenei na fetalai ai le Alii ia te oe, ou te tuu atu le ua ita ia te oe i lou lima e te faia ia te ia pei ona e loto i ai...*

O lea ua maua lelei le avanoa o Tavita e na te tau ai le ita o Saulo ia te ia, auā lea ua alu atu nao Saulo, ao lo o toatele latou ma lana vaega. Peitai e lei manatu lava Tavita e na te tau ai le loto leaga o Saulo ia te ia. Ua tulai Tavita ua ia sesele ese le pito ofu o Saulo. Ua tupu le alofa o Tavita ia Saulo e ui ina agaleaga ia te ia. Faimai upu a Tavita – *Ia faamamao e le Alii ia te au ona ou faia lena mea i lo’u alii le ua faauuina e le Alii, e faaoo ai lo’u lima ia te ia, aua o ia ua faauuina e le Alii*. Ua faalogo ai tagata na nonofo ma Tavita i upu ia a Tavita, ona le o atu ai lea o latou e fasi ia Saulo. Ua tulai Saulo ma toe ulufafo ma le ana ma toe o atu ma ona tagata.

Tamaiti, o le Ana i Enokati sa maua lelei ai le avanoa o Tavita e tau ai le agaleaga o Saulo ia te ia. Peitai, ua le’o le tau ai le leaga, a ua tau ai i le loto faamagalo ma le loto alofa. Ua aoao mai i ai tatou le fanau – aua tatou te tau ma sui. Ia tatou maua le loto faamagalo ma le loto alofa e pei ona faia e Tavita. Ia manuia tele outou le fanau.

**Uiga o Upu**

- i) Ufiufi i ona vae - toe fai lelei lona ofu ina ia ufiufi ai ona vae,,(ofu tatapuvae o le Tupu)
- ii) Papa o oti o le vao - nofoaga e tataa ai oti o le vao
- iii) Muliana - pito i tua o le ana
- iv) Tuia - ootia, faanoanoa

**GALUEGA FAATINO: PASO**

Saili mai upu

Faamamao, Enokati, Saulo, Tavita, Isaraelu, ufiufi.

A	E	I	S	A	R	A	E	L	U
S	T	O	A	O	S	V	T	S	F
P	U	P	U	K	A	S	A	A	I
K	I	E	L	L	O	O	V	N	U
L	E	N	O	K	A	T	I	M	F
M	O	F	A	T	N	P	T	O	I
S	F	A	A	M	A	M	A	O	E
A	M	G	A	R	N	L	E	P	S

**PESE** : O Saulo o le tupu o Isaraelu  
 Fia fasi ia Tavita i le pelu  
 Ha Ha ha..e le mafaia

Lafi Tavita i Enokati  
 Tuli e Saulo ma lana ami  
 Hi Hi Hi..taui ma sui


**TALI:**

Ulu atu ia i totonu o le ana  
 O lo o i aiTavita ma lana aumalaga  
 Ua oso le alofa o Tavita ia te ia  
 O le auauna ua uma ona faauuina.....(*fati : Daniel Boom Beautiful Sunday*)

**A'OA'OGA:**

1. Aua le taui ma sui
2. Ia tatou maua le loto alofa
3. Ia loto faamagalo

**O LE ANA I ENOKATI NA MAUA AI E TAVITA SAULO**



\*\*\*\*\*

**ASO SA:** 19 Setema 2021

**MATAUPU :** **O LE TOVINE**

**SINI :** Ia malamalama le fanau o le ola galue, e iloa ina ua e loto foai

**TUSI FAITAU :** Luka 20:9 – 16

**FESOASOANI MO FAIAOGA:**

O le tala sa tatou faitauina Tamaiti i lenei taeao, o le faataoto sa tautala atu ai Iesu i ai latou na mulimuli atu ia te ia. O nisi o i latou nei o Taitai o le Lotu Iutaia e pei o le Au Faresaio ma le Au Satukaio. O le Faataoto Tamaiti – o se tala faa-faatusa e faatusa i ai se mea e manatu ai Iesu o lo o tupu i totonu o le siosiomaga o tagata.

O le faataoto la a Iesu, faimai o le tasi tagata ma lana tovine poo le togavine. Ua ia tuu atu lana togavine i e galulue vine, ae ua alu malaga o ia i le nuu mamao. Ua oo i le taimi ua iloa ai e le e ana le togavine ua tatau ona maua mai ni fua o le faatoaga. Ona auina atu ai lea o lana auauna ia te i latou ina ia aumai ni fua o le tovine, peitai ua sasa o ia e le au galulue i le tovine ma toe tuli mai e sau e leai se fua o le tovine na alu ma Ia. Ua toe auina atu foi e le pule o le tovine leisi foi auauna, a ua latou sasa foi ma agaleaga ia te ia, ma toe tuli e leai se fua na alu ma ia. Ua toe auina atu foi e ia lona tolu o ana auauna e aumai se fua o le tovine, a ua latou fasi foi ia te ia, ua manu'a ma ua latou tulieseina.

Ua manatu le tamaloa e ona le tovine, o le a ia auina ane i ai lona atalii pele e toatasi, atonu latou te ava ifo ia te ia ma tuu ane ia te ia ni fua o le tovine. Ia o le tala tamaiti faimai na iloa atu loa e le au galulue i le tovine le atalii o le tamaloa ua sau, ona latou fetautalatalaa'i (talanoa) ai lea ma faapea ane *O le suli lena o le tamaloa, ina tatou fasioti ia te ia, e maua ai le fanua mo i tatou....* Ua latou tuli le atalii o le tamaloa i tua o le tovine ma latou fasioti ia te ia.

Faimai le fesili Se a foi le mea e faia ia te i latou e le alii e ana le tovine? Faimai le tali a Iesu *E alu atu ia ma faauma ia tagata galulue i vine e tuu atu foi le tovine i nisi tagata.* O le tala faa-faatusa lea i le Tovine sa faamatala e Iesu i le motu o tagata.

***(E i ai le uiga loloto o le faataoto – ae fautuaina le faaogaina mai pea o mea o lo o tutupu i le tala i le tovine. Ae taoto atu lava i Lau Susuga i le Faiaoga)***

Ao le a se aoaoga mo tatou le fanau – E iloa lo tatou ola galulue ina ua maua ni fua lelei. E lei maua e le tamaloa e ana le tovine ni fua ona o le ola manaonao o le au galulue. Aua tatou te ola manaonao fua i mea a isi, aua o iina tatou te faia ai loa le mea sese. A e toaga e fai meaaoga e fua mai i le faamanuiaina i le faaiuga o le tausaga.

**Uiga o Upu:**

i) Aufuaina: alu e leai se mea e avea



ii) Fetautalatalaa'i: talatalanoa

**GALUEGA FAATINO: FAAFETAUIGA O UPU MA UIGA**  
Faafetaui upu i o latou uiga

Faataoto: talatalanoa  
Aufuaina: tala faa-faatusa  
Fetautalatalaa'i: o le tagata e tau i le isi tagata (atalii)  
Suli : alu e leai se fua o le tovine

**PESE: O LE TAMALOA MA LE FAATOAGA**

Ia Ia Ia.....

O le toga vine ua manaia

Ia Ia Ia.....

Tuu i tagata ae malaga

Ao auauna ua fasia

Tulieseina i le faatoaga

Taui lea ma le Atua.....(*fati: Oh Mc Donald,,,,,Pese Misiluki...O le faatoaga*)

**A'OA'OGA:**

1. Ia galulue faamaoni
2. Aua le ola manaonao i mea a isi
3. Ia maua le loto alofa.

\*\*\*\*\*

**ASO SA:** 26 Setema 2021

**MATAUPU :** **O LE TAMA O SAMUELU**

**SINI :** Ia malamalama le vasega o Samuelu o le tama na filifilia e le Atua e avea ma Perofeta.

**TUSI FAITAU :** 1 Samuelu 3:1 – 10

**FESOASOANI MO FAIAOGA:**

O Samuelu o le tama a le fafine e igoa ia Hana. O le tamā o Samuelu o Elekana. O le tama lenei o Samuelu sa tatalo faatauanau ai Hana i le Atua. Na ia tautino i le Atua afai ae foai mai se tama tane, o le a ia toe foai atu mo Ia. Lea na alu ai loa Hana ua ave lana tama e nofo ma auauna ia Eli le ositaulaga sili. Ona nofo ai lea o Samuelu ia Eli ma auauna ma fesoasoani i si toeaina o Eli, i ana galuega faa-ositaulaga.

O le toeaina o Eli ua faasolo ina matua lona ola, ua afuafua foi ona popogi o ona mata, ua le mavaai. O lona uiga ua faaletonu le pupula a Eli ma ua faasolo ai lava ina tauaso. Fai mai le tala i se tasi o po ao taoto Eli ma Samuelu e momoe i le po, i totonu o le malumalu o lo o i ai le atolaau a le Atua. Ona valaau ai lea o le Alii ia Samuelu, ua tali atu Samuelu. *O a'u lenei..*Ona momoe atu lea o ia ia Eli ma na fai atu ai. *O a'u lenei, aua na e valaau atu ia te au.* A ua faimai o ia. *Ou te lei valaau, fo'i ia, ina taoto.* Ona alu atu lea o ia ua taoto.

Ua toe valaau faalua le Alii, *Samuelu e.* Ona tulai lea o Samuelu, ua alu atu ia ia Eli, ua fai atu ai, *O a'u lenei aua na e valaau atu ia te au.* Ua fai mai o ia *Ta e, ou te lei valaau atu, foi ia ina taoto.* Ona toe foi lea o Samuelu i lona moega, e lei iloa lava e le tama o Samuelu o le Alii o loo valaau atu ia te ia.

Ua toe valaau le Alii ia Samuelu, o le foi faatolu lea; ona tulai lea o ia ua alu atu ia Eli ua fai atu. *O a'u lenei aua na e valaau atu ia te au.* Ua iloa e Eli o le Alii lea ua valaau ia Samuelu. Ona fai atu lea o Eli ia Samuelu e toe alu e taoto, afai ae toe valaau atu, ona e tali atu ai lea..Le Alii e, fetalai maia ao faalogologo atu lau auauna....Ua toe foi Samuelu ma taoto i lona moega ona toe valaau atu lea o le Alii..ona nofo lea i luga o Samuelu ma faapea atu Fetalai mai ia le Alii e, aua o faalogologo atu lau auauna....O le valaau a le Atua ia Samuelu o le filifilia lava lea o Samuelu e avea ma Perofeta ia Israelu.

O le tatou tala lena tamaiti, ao se aoaoga mo tatou le fanau – Ia pei i tatou o le tama o Samuelu. Na faatolu ona valaau le Alii ia Samuelu, ae nao le faa tasi lava le valaau tali mai loa Samuelu. Ao tatou tamaiti e faatolu na valaau mai tatou matua i ni feau ae le taitai ona faalogo ai tatou. Aua tatou te faalogo gata, a ia faalogo gofie i le faatonuga a matua...

**Uiga o Upu ma Fuitau:**

i) Valavala: tau le fa'aalia mai

- ii) Afuafua ona popogi : amata ona nenefu le vaai  
 iii) Atolaau : Afioaga o le Atua/faailoga o le Atua auai

**GALUEGA FAATINO: TALIGA FESILI**

1. O ai matua o Samuelu?  
 Tali: O Elekana ma Hana
2. O le a le galuega sa fesoasoani ai Samuelu ia Eli?  
 Tali: Fesoasoani i galuega faaositaulaga
3. E faafia ona valaau le Atua ia Samuelu?  
 Tali: E faatolu
4. E fia valaau ona tali lea o Samuelu?  
 Tali: E faa-tasi

**PESE:**

Valaau valaau le Alii ia Samuelu  
 O ia o le perofeta ia Isaraelu  
 Samuelu x3..filifilia  
 Fai ma taitai i lona nuu i le manuia.....(*fati : mb mb malosi malosi,,*)

**A'OA'OGA:**

1. Aua le faalogogata  
 2. E valaau mai le Atua ia i tatou  
 3. E filifilia i tatou e le Alii

# O SAMUELU



\*\*\*\*\*

**ASO SA :** 24 Oketopa 2021

**MATAUPU :** **UA PUPULA LE TAUASO**

**SINI:** Ia malamalama le vasega o le pupula o le tauaso o le fa'aalia lea o le mana silisili ese o le Atua.

**TUSI FAITAU :** Luka 18:35 – 43

**FESOASOANI MO FAIAOGA:**

Ua alu atu pea Iesu i lana galuega, ua latalata o Ia i le aai o Ieriko. O lo o nofo ai i autafa o le auala le tagata tauaso, o lo o aisi solo o ia i mea e manao i ai. Na savavali atu Iesu ma le motu o tagata. Ua faalogo le tauaso o lo o ta'uta'u e tagata le igoa o Iesu, ona fesili lea o ia pe se a lea? A ua tali ane le motu o tagata – *“O Iesu le Nasareta ua maliu ane o Ia”*. E lei toe faatali le tagata tauaso, a ua tauvalaau ma alaga leo tele ia Iesu. *Iesu e le alo o Tavita, ia e alofa mai ia te a'u*. Na vavao o ia e nisi o tagata, peitai ua atili ai ona leotele le alaga a lenei tagata tauaso. *Le alo o Tavita e, ia e alofa mai ia te a'u*. Fai mai ua tu Iesu ma faiatu ina ia ta'ita'iina mai o ia ia te Ia.

Ua latalata mai o ia, ona fesili atu lea o ia ia te ia..*Se a le mea e te manao i ai ou te faia mo oe?* Ua fai mai o ia *Le Alii e, ia va'ai ou nei mata*. Ona fetalai atu lea o Iesu ia te ia – *Ina vaai ia ou mata, o lou faatuatua ua e malolo ai*. Ona pupula ai lea o mata o le tauaso, ua mulimuli atu o ia ia Iesu, ua vivii atu i le Atua. Ua iloa e tagata uma o le nuu le vavega ua faia e Iesu, ona latou tau fai vivii atu ai lea i le Atua.

Ioe tamaiti o le faatuatua o lenei tagata tauaso na faigofie ai ona faamalolo e Iesu. O le alaga leotele o le tauaso e iloa ai o le tagata ua ia iloa lelei e maua lona mapusaga mai le Alii Faaola o Iesu Keriso. O se aoaoga foi lea mo tatou le fanau, ia tatou talitonu ma faatuatua i le mana silisili ese o le Atua, e faia ai vavega i lo tatou ola.

**Uiga o Upu:**

i) Faatoga : aisi, tauanau, asamo.

**GALUEGA FAATINO:** Faatumu avanoa i upu o loo i lalo?

Iesu, alofa, Ieriko, tauaso, faatoga, Tavita, motu, alaga,

Ua latalata o ia i 1 \_\_\_\_\_, a ua nofo i le auala se tasi 2 \_\_\_\_\_ o 3 \_\_\_\_\_ i mea. Ua faalogo o ia i le 4 \_\_\_\_\_ o tagata ua savavali ane. Ona alaga mai ai lea o ia 5 \_\_\_\_\_ le alo o 6 \_\_\_\_\_ ia e 7 \_\_\_\_\_ mai ia te au.

**PESE: O LE TAUASO**

O a'u o le tausao ua sau  
 Ma le loto ua faanaunau  
 Lagona lou fia vaai  
 Iesu e sei e alofa mai.....

**Tali:**

Faaolataga, sili ai o mea uma  
 Ta fia pupula .....uuuuuu  
 Ta fia vaai ...lalala  
 Lou Alii e, Iesu alofa mai.....(*fati..O a'u o le pipili..*)

**A'OA'OGA:**

1. Ia tumau lo tatou faatuatua
2. E faia e le Atua vavega i lo tatou ola
3. Ia tatou alolofa i tagata mama'i



**UA FA'AMALOLO E IESU LE TAUASO**



\*\*\*\*\*

**ASO SA :** 31 Oketopa 2021

**MATAUPU :** **E ALOFA IESU I TAMAITI**

**SINI:** Ia malamalama le vasega e alofa Iesu i tamaiti ona e faapei oi latou o e o le malo o le lagi.

**TUSI FAITAU :** Mareko 10:13 - 16

**FESOASOANI MO FAIAOGA:**

Faat alofa atu ia te outou le fanau i lenei taeao fou. Fai mai le tatou mataupu *E alofa Iesu i tamaiti*. Ioe! Tasi lea o uiga o Iesu, o le alofa. E alofa i ai tatou le fanau. O le tala fai mai na omai isi tagata ua latou aumai tamaiti ia Iesu ao i ai o Ia i lana galuega o le aoao atu i tagata. Ua iloa atu e le ausoo tagata na latou aumaia tamaiti, ona latou o atu ai lea ma vavao atu i nei tagata ina ia aua nei aumaia o tamaiti ia Iesu. O le manatu o le au soo, e le tataua ona soli mai e tamaiti lo latou matai o Iesu.

Na iloa atu e Iesu ona soo o lo o vavao i tamaiti, ona tupu tele ai lea o lona ita (tiga ai lea o lona finagalo ). Ona fai atu ai lea o Iesu i ona soo –*Ina tuu mai ia o tamaiti e o mai ia te au, aua le vavao ia te i latou ; aua e faapei o i latou nei o e o i le malo o le Atua. E moni, ou te fai atu ia te outou, Ai se le talia le malo o le Atua faapei o se tamaitiiti, e le sao lava i ai...* Ona siitia lea e Ia o i latou i ona lima, ua faaee foi ona aao i luga ia te i latou, ma faamanuia ia te i latou.

E alofa Iesu i tamaiti, ona ua faatusa i ai e Iesu i latou o e o i le malo o le lagi po o le ola e faavavau. O Tamaiti e mamā o latou manatu, o tamaiti o le taimi o le ola mama ma le leai o se agasala latou te faia. O le uiga lena o le fetalaiga a Iesu na ia talia ai tamaiti e tuu mai ia te ia. Aua a le ola mama le tagata ma aloalo ese mai le faia o le agasala faapei o se tamaitiiti, e le mafai lava ona sao atu i le malo o le ola e faavavau.

O le tatou tala lena – ao se aoaoga foi lea mo tatou le fanau. Ia tumau lo tatou ola mamā ma aloalo ese mai le agasala ma ni mea sese tatou te faia. Ua tatou iloa mautinoa e alofa Iesu i ai tatou ona o tamaiti o lo o faatusa i ai le amio a le tagata e sao ai i le malo o le Atua. Afai e alofa Iesu ia i tatou, e tataua foi la ona tatou alolofa ia Iesu ma faia lona finagalo

**Uiga o Upu:**

i) Vavao : taofi

**GALUEGA FAATINO: Faafetaui upu i o latou uiga (Matching)**

- |      |         |   |               |
|------|---------|---|---------------|
| i)   | Vavao   | - | tautala atu   |
| ii)  | Siitia  | - | taofi         |
| iii) | Fetalai | - | e ola mama    |
| iv)  | Tamaiti | - | aumaia ma sii |



**PESE: IESU E ALOFA I TAMAITI**

Iesu alofa i Tamaiti  
 Tamaiti uma o le lalolagi  
 Enaena, paepae, uliuli, samasama  
 E alofa Iesu ia oe ma a'u.

Jesus loves the little children  
 All the children of the world  
 Red and brown, black and white  
 They are precious in his sight  
 Jesus loves the little children of the world

**A'OA'OGA:**

1. Ia ola mama
2. E alofa Iesu i ai tatou
3. Aloalo ese mai le agasala.

## E ALOFA IESU I TAMAITI



\*\*\*\*\*

## **MANATU TAIALA O NOVEMA : E OFOFOGIA LE ATUA**

O lenei masina o le a faataua ai le ofoofogia o mea na faia e le Atua. O le faailoga e iloa mautinoa ai le eseese o le malosi o le tagata ma le mamalu silisili ese o le Atua. Ua maoae i nei vaitau le fia ofoofogia o le tagata ona o le potu ma le silafia ua iloa. Peitai e ui i se potu, e le mafai lava ona ausia ai le tulaga ese o le Atua.

**ASO SA :** 7 Novema 2021

**MATAUPU :** **O LE ASINI**

**SINI :** Ia malamalama le vasega o le asini na faaali mai ai le silisili ese o le Atua.

**TUSI FAITAU :** Numera 22:21 – 28(Mo le Vasega)  
Numera 22:1-28( Mo le Faiaoga)

### **FESOASOANI MO FAIAOGA:**

O le asini tamaiti, o se tasi lea o manu vaefa sa tele i Isaraelu i aso ia. O ona foliga e tai tutusa ma le solofanua. O se manu e filemu e le soona ulavale, sa faaaogaina e tagata Isaraelu e felaua’i ai a latou uta mai lea nofoaga i lea nofoaga. O le manu lea sa tietie ai foi Iesu i lana malaga faatupu.

Fai mai le tala - Na manao le tupu o Moapi o Palako lona igoa, ina ia alu atu Palaamo e faamalaia Isaraelu. Ona tapena lea e Palaamo o lana asini ma alu loa ia Palako. Fai mai le tala na iloa lelei e le Atua le mafuaaga ua alu ai Palaamo ia Palako, ina ia fetu’u(faa-malaia) lona nuu o Isaraelu. Ona ita ai lea o le Atua ia Palaamo.

Ao tietie atu Palaamo i lana asini, na iloa atu e le asini le agelu o tu mai i le auala ma le pelu. Ae lei iloa e Palaamo. Ona alo ese ai lea o le asini mai le ala ae oso i le vao. O le auala foi fai mai e va iti, e iai foi pa i autafa. Ua le alu le asini ona o le agelu o poloka ai le auala, ona taoto ai lea i lalo o le asini. Ona sasa ai lea e Palaamo o le asini. O le tala fai mai ua fiu Palaamo e sasa le asini e le alu. Na te’i a Palaamo i le tautala mai o le asini ia te ia. *“Se a ea se mea ua ou faia ia te oe, ua e sasa faatolu mai ai ia te a’u?”* Ona faapupulaina lea e le Atua mata o Palaamo, ma ia iloa ai le agelu o lo o tu i le ala.

Ia Tamaiti o le tatou tala lena, ua tatou iloa ua tautala le asini ua faaalia ai le mana silisili ese o le Atua. O le aoaoga mo i tatou le fanau – E mafai e le mana o le Atua ona faia mea ofoofogia i lo tatou ola. E le mana’o le Atua e tatou te faia ni mea sese. Ae ao ona tatou faalogo i le leo o le Atua o lo o ala mai i o tatou matua.

### **Uiga o Upu:**

- i) Faanofoa: tapena le nofoaga i luga o le patua o le asini
- ii) Toasa: ita

iii) Va apiapi: va iti, tau faaofi

**GALUEGA FAATINO: MATEGA TUPUA**

1. E fa o'u vae, ou te auauna e aunoa ma se gagana. Na faafuasei ona ou tautala i gagana a tagata..O ai la a'u?
2. Ou te malosi ma e falagolago tele tagata i lo'u mana e faamalaia ai tagata. Ou te leiloa sa tu se agelu i luma o le auala...O ai la a'u?

**PESE:**

Aue asini asini e x2  
Faatautala e le Alii e...

Aue Palaamo Palaamo e x2  
Fapupula e le Alii e.....

**A'OA'OGA:**

1. E ofoofogia mea e faia e le Atua
2. Aua tatou te faia ni mea sese i luma o le Atua
3. E tutupu vavega i lo tatou ola pe a faalagolago i le Atua.



## UA TAOFI E LE AGELU LE ASINI



\*\*\*\*\*

**ASO SA :** 14 Novema 2021

**MATAUPU :** “O OE O LE KERISO”

**SINI :** Ia malamalama le vasega, e taua lo tatou talitonu o Iesu o le Keriso ma ia atagia i lo tatou ola i aso uma uiga faa-Keriso.

**TUSI FAITAU :** Mareko 8: 27 – 30

### **FESOASOANI MO FAIAOGA:**

O lo o faagasolo pea le galuega talai ma le faamaloloina o e mama’i a le Alii Faaola o Iesu Keriso. O lo o molimau ma vaavaaai pea i ai le au soo. Ina ua uma ona faamalolo e Iesu le tagata tauaso, ona latou o atu ai lea ma ona soo i aai o Kaisareia Filipino. Ua savavali atu pea i latou i le ala, ona fesili atu ai lea o Iesu i ona soo ua faapea atu – *Pe se a le upu a tagata ia te au nei, po o ai?* Ona latou tali atu ai lea – Ua faimai tagata o Ioane le papatiso, a ua fai mai nisi o Elia, ao nisi ua latou fai mai o se tasi o le au perofeta.

Ona fetalai atu ai lea o Iesu ia te i latou – *Ao outou na, se a la outou upu ia te a’u nei po o ai?* Ona tali mai ai lea o Peteru ia te ia – *O oe o le Keriso.* Ona vavao atu lea o ia ia te i latou ina nei latou ta’u atu o ia i se tasi. Ioe tamaiti – O Iesu o le Keriso, o le alo pele o le Atua na auina mai ina ia nonofo faatasi ma tagata. Manino i le tali a Iesu ia Peteru ma ona soo, aua nei o latou ta’u atu i tagata o ia o le Keriso. E le manao Iesu e iloa e tagata o ia o le Keriso, o uiga ia o Iesu. O le tagata e le faalialia vale ma fia iloa i tagata. Ao le tagata e faia pea ana galuega faamalolo ma ana aoaoga i tagata. O ana gaoiga ia e iloa ai lava e tagata o ia o le Keriso, e aunoa ma se ta’uina atu e soo i tagata.

O se aoaoga mo tatou le fanau, e iloa i tatou ia tatou galuega lelei ma mea lelei tatou te faia. E le ta’uta’ua se tamaitiiti na te faia se amio leaga ma se amio mataga. O Iesu o le Keriso, ma ia atagia i lo tatou ola amio faa-kerisiano. Aua tatou te faalialia vale ma fia iloa i luma o tagata. E iloa i tatou i a tatou galuega.

### **Uiga o Upu:**

- i) Maliu : alu atu
- ii) Vavao : taofi

### **GALUEGA FAATINO:FAATULAGAGA O LE TALA** Faatulaga sao mai le tala i lona faasologa sa’o?

1. Ona latou tali mai lea o Ioane le papatiso.
2. Ona vavao atu ai lea o ia ia te i latou
3. Ua maliu atu Iesu ma ona soo i aai o Kaisareia Filipino
4. Pe se a le upu a tagata ia te a’u?

**Tali :** 3, 4, 1, 2.

**PESE: HE IS LORD**

He is Lord (x2)  
He has risen from the dead  
He is Lord  
Every knee shall bow  
Every tongue confess  
That Jesus Christ is Lord

O Ia o le Alii (x2)  
Ua toetu mai le oti  
O Ia o le Alii  
Tootuli uma i ai tulivae  
Ta'uta'u atu i laulaufaiva  
O Iesu Keriso le Alii

**A'OA'OGA:**

1. Ia atagia Keriso i lo tatou ola
2. Aua le fia iloa ma faalialia vale
3. E iloa i tatou i a tatou galuega lelei.

\*\*\*\*\*

**ASO SA :** 21 Novema 2021

**MATAUPU :** **O LE ASIOSIO**

**SINI :** Ia malamalama le fanau o le asiosio o le auala lea na finagalo ai le Atua e ave ola ai le perofeta o Elia

**TUSI FAITAU :** 11 Tupu 2:9 - 14

**FESOASOANI MO FAIAOGA:**

Ina ua uma ona sopoia atu e Elia ma Elisaia le isi itu o le vaitafe o Ioritana. Ona fesili lea o Elia ia Elisaia pe i ai se mea e manao ai e na te faia mo ia, manu e lei aveeseina o ia e le Atua. Ona tali atu ai lea o Elisaia – *Ia faalua mai lou agaga ia te au.* O lona uiga tamaiti, ua manao Elisaia e pei o Elia e ala lea i lo la va fesootai ma le Atua. Ua tali atu Elia – e faigata tele le mea ua manao ai Elisaia, ae afai e na te iloa atu Elia pe a aveeseina ona mafai ai lea ona faalua mai le agaga o Elia ia te ia, ae afai e leai o lona uiga e le mafai lava ona maua e Elisaia faamanuiaga o lo o ia Elia.

Fai mai le tala tamaiti- Ua la savavali atu pea laua ma talatalanoa, ae faateia loa ina ua la vaaia le nofoa afi faataavalevale ma solofanua afi. Ona agi mai ai lea o le matagi lea e ta’ua o le asiosio. O le asiosio tamaiti o le ituaiga matagi malosi lea e agi faataamilomilo agai luga le lagi. (*manaia ae saunia se ata e vaavaai ai fanau*). O le matagi malosi la lea e igoa o le asiosio na aveina ai loa Elia i le lagi. E vaai atu Elisaia ua ea i luga vae o Elia i le matagi, ona alaga ai lea o Elisaia ma le leotele – *Lo’u tama e, lo’u tama e, le kariota o Isaraelu ma ana ‘au e tietie i solofanua*. Ua leiloa atu e Elisaia Elia aua ua mamao lava le aveina a’e o ia, ae na paū mai lalo le ofu tele o Elia. Ua tago Elisaia i lona ofu ua saeluaina, ua ia ave foi le ofu tele o Elia na pau mai le lagi ua taia (ta ai) ai le vaitafe ona vaeluaina ai lea i le tasi itu ma le tasi itu ona ia sopoia ai lea o le vaitafe.

O le aveina a’e o Elia e le matagi o le asiosio – o le finagalo lava lea o le Atua mo lana auauna o Elia. O Elia o se auauna sa galue faamaoni ma faia le finagalo o le Atua i Isaraelu. O se feau foi lea mo tatou le fanau. E i ai feau taua o lo o finagalo ai le Atua mo tatou – e tatau ai ona tatou faamaoni ma faamalolosi e faia lona finagalo. O lo tatou ola aoaoina o le finagalo lava lea o le Atua mo tatou. Ia tatou faamaoni ma toaaga i le aoga, aua o le finagalo lea o le Atua ina ia tatou maua ni lumanai lelei. Ia manuia tele outou le fanau.

**Uiga o Upu:**

- i) Tautalatala fano : talatalanoa
- ii) Kariota: taavale e toso e solofanua



**GALUEGA FAATINO: TALI MAI I LE SA'O PO'O LE SESE**

1. O Elia ma Elisaia na ave olaina i le lagi

Tali: Sese

2. *Ia faalua mai lou agaga ia te au* – O upu ia a Elisaia

Tali: Sa'o

3. Ua vaeluaina le vaitafe ina ua taia e Elisaia i lona ofu.

Tali: Sese

4. Na sae lua e Elisaia le ofu o Elia.

Tali: Sese

**PESE:** Elia le perofeta sa tautua

Ua maua lona tau mai le Atua

Le asiosio ua siitia o ia

Ua sao i le lagi ma le fiafia.... (*fati : Le alofa o le Atua e ofoofogia..*)

**A'OA'OGA:**

1. E finagalo le Atua ia tatou galulue faamaoni

2. E faaeaina le auuna faamaoni pei o Elia

3. Ia toaaga i le aoga.

**UA AVEINA A'E ELIA I LE LAGI E LE ASIOSIO MA KARIOTA**



\*\*\*\*\*

**ASO SA :** 28 Novema 2021

**MATAUPU :** **VAVEGA NA FAIA E ELISAIA**

**SINI :** Ia malamalama le vasega o le vavega na faia e Elisaia na faasoina ai le aiga sa nofo aitalafu.

**TUSI FAITAU :** 2 Tupu 4:1 – 7

**FESOASOANI MO FAIAOGA:**

Sa i ai le tasi o soo o le au perofeta. Ua maliu o ia ae toe ai na’o lona toalua ma lana fanau. Ua le iloa e le tina poo fea a maua mai ai se tupe e totogi ai a latou aitalafu, aua ua maliu lona toalua sa faigaluega malosia e maua mai ai tupe. Ona saili fesoasoani lea o le fafine ia Elisaia le perofeta. Ua fesili ia Elisaia i sana fesoasoani ona ua alu ifo Le sa latou nofo aitalafu ai, ua manao e totogi atu la latou aitalafu ae leai se tupe. Ae afai e le totogia o le a na ave i lana fanau e fai ma ana pologa

Ona fai atu lea i ai o Elisaia ia te ia – *Se a se mea ou te faia ia te oe? Ina ta’u maia ia te a’u, pe se a se mea o ia te oe o i lou fale?* Ona tali atu ai lea o ia – *E leai se mea a lau auaua fafine o i lo’u fale, ua na o le fagu suauu lava.* Ona fai atu ai lea o Elisaia e alu e matua saili ifo ni ipu i ona tagata tuaoi ia tele. Ona alu lea i totonu o lona fale e toso se pupuni ae utu ai le suauu o lo o i lona fale. A uma na utu lea fagu/ipu ma tuu ese, ua uma ipu na utu ai le suauu ae lei uma lava le suauu sa i le fagu. Ua alu o Ia ma ta’u atu ia Elisaia ua uma ona utu le suauu. Ona fai ifo ai lea o Elisaia e alu e faatau a maua mai tupe ona ave lea e totogi ai la latou aitalafu. Ao le tupe e totoe e tuu latou te ola ai.

O le vavega na faia e Elisaia o le suauu sa i le fale o lenei tina. E nao le tasi le fagu suauu a lenei tina ma lana tama, peitai lea ua tele fagu suauu na maua mai ai ina ua uma ona utu. Ua toe maua le fiafia e lenei tina ma lana fanau ina ua faia ai e Elisaia le vavega i lo latou aiga. O se aoaoga mo tatou le fanau – tatou saili fesoasoani i le Atua. O a mea e tutupu ma faafitauli e oo mai, tatou saili i le Atua e maua ai le fesoasoani. Na maua le manuia o le aiga ina ua saili lenei tina i le Atua, e ala atu i le perofeta o Elisaia.

**GALUEGA FAATINO: FAATINO LE TALA**

- O le tala lenei e manaia tele ae faia se faatinoga puupuu e maua atoa ai lagona o le vavega na faia e Elisaia.

**PESE: O MAFATIAGA**

O Mafatiaga e ave uma ia Iesu  
 Aua o ia e alofa ia te au x2  
 Luga luga luga luga luga luga luga luga

Sii Iesu i luga  
Lalo lalo lalo lalo lalo lalo lalo  
Tulei Satani i lalo

Cast your burden unto Jesus  
For He cares for you  
For He cares for you  
Higher x8  
Lift Jesus higher  
Lower x8  
Stomp Satan lower

**A'OA'OGA :**

1. Saili fesoasoani i le Atua
2. E tali mai le Atua i o tatou mafatiaga
3. E tutupu vavega i lo tatou ola.

**UA AGALELEI ELISAIA I LE FAFINE UA OTI LANA TANE**



\*\*\*\*\*

## MANATU TAIALA O TESEMA: IESU E FAAOLA MAI

O le auga lava lea o le afio mai o le Alii Faaola ina ia faaola i le lalolagi agasala. Lea foi e i ai le faataua o lenei masina o le a aga atu i ai le kalena a le lalolagi. O le masina e faamanatu ai le fanau mai o le Alii e faaola le lalolagi. O le faaolataga mo le lalolagi i le ola e faavavau ina ua tatou salamo ma faatuatua faamaoni.

**ASO SA :** 5 Novema 2021

**MATAUPU :** **UA FAAFOFOGAINA E LE ATUA LE TATALO A SAKARIA**

**SINI :** Ia malamalama le vasega e tali mai le Atua i a tatou tatalo.

**TUSI FAITAU :** Luka 1: 13 - 17

### FESOASOANI MO FAIAOGA:

O Sakaria tamaiti o ia o le ositaulaga sili a le tupu o Herota. O lona toalua o le fafine e igoa ia Elisapeta, sa amiotonu i laua i luma o le Atua ma savavali i poloaiga ma tulafono uma a le Alii. Na tofia Sakaria ina ua ū ia te ia le vili, e ulufale i le malumalu i le mea e faamu ai mea manogi. Ao tu ai la Sakaria i le fata e faamu ai mea manogi i totonu o le malumalu, faimai sa faaali ai le agelu. Ua faapea atu le agelu ia te ia *Sakaria e aua e te mata'u, aua ua faafogaina lau tatalo; e fanau lau ava o Elisapeta sou atalii, e te faaigoa ia te ia o Ioane.*

O Sakaria ma Elisapeta ua matutua o la ola, e le mafai ona la toe fanaua se tama tane. O le mea lea ua leva ona tatalo faatauanau ai si toeaina o Sakaria i le Alii, ina ia la maua se tama tane. A lea ua faaali ai le agelu a le Alii. O lea o le a o la fanaua se tama tane ma faaigoa ia Ioane. Faimai le molimau a Luka i le tama lenei o Ioane, e maua ai e Sakaria le fiafia ma le olioli ia te Ia. E sili o ia i luma o le Alii; e le inu o ia i le uaina po o le ava malosi, e faatumuina o ia e le agaga paia. E faaliliu e ia le fanauga a Israelu e toatele i le Alii lo latou Atua.

E muamua atu o ia i ona luma ma le agaga ma le malosi o Elia, e faaliliu e ua faalogogata i le potu o e amiotonu, e sauni le nuu e **fatatauina** mo le Alii. Ioe tamaiti- O uiga ia o le tama o Ioane pe a fanau mai. O Ioane o le tama lea na tatalo faatauanau ai Sakaria i le Alii, lea ua tali mai. O se tagata ua toe ave uma lona ola mo le Atua. O Ioane lea sa avea ma papatiso, na ia muamua mai ia Iesu e talai le salamo i tagata. O ia foi lea sa faaigoaina o le teuteu ala, na ia sau e tapena loto o tagata aua le afio mai o le Mesia.

Ioe tamaiti, o le aoaoga mo tatou i lenei taeao. E tali mai le Atua i ai tatou ia tatou tatalo pe a tuu atoa i ai o tatou loto. E alofa mai o ia i ai tatou i mea tatou te mananao i ai.

### Uiga o Upu:

i) Faatatauina : avea ma tagata o le Alii

**GALUEGA FAATINO: TALIGA FESILI**

1. O ai le igoa o le toalua o Sakaria?
2. O le a le galuega a Sakaria ?
3. O le a le tala a le agelu na fai ia Sakaria?
4. O ai le igoa o le tama a Elisapeta ma Sakaria?

**PESE: WHISPER A PRAYER**

Whisper a prayer in the morning  
 Whisper a prayer at noon  
 Whisper prayer in the evening  
 To keep your heart in tune

Fai sau tatalo i le taeao  
 Fai sau tatalo i le ao  
 Fai sau tatalo i le po  
 E faafiafia ai lou loto

God answers prayers in the morning  
 God answers prayers at noon  
 God answers prayers in the evening  
 To keep your heart in tune

**A'OA'OGA:**

1. E tali mai le Atua i a tatou tatalo pe a faamaoni lo tatou ola galue
2. Ia toaga e tatalo
3. Tatou faamoemoe i le Atua ma le loto atoa



# UA FA'AFOfOGAINA E LE ATUA LE TATALO A SAKARIA



\*\*\*\*\*



**ASO SA :** 12 Tesema 2021

**MATAUPU :** **O LE FALE MANU**

**SINI :** Ia malamalama le vasega o le fale o manu ua faaalua ai le maulalo o le ala na fanau mai ai Iesu.

**TUSI FAITAU :** Luka 2:1 - 7

**FESOASOANI MO FAIAOGA:**

Talofa tamaiti! Lea ua tatou latalata atu i le aso Kerisimasi, e faamanatuina ai le fanau mai o le Alii Faaola o Iesu Keriso. O le aso e maua uma ai tatou meaalofo, aua o le aso o faiga meaalofo. O le tatou mataupu foi lea i leni taeao, o le fanau mai o Iesu i le fale o manu.

Sa faia le tusiga igoa i Peteleema, ona o ai lea o Maria ma Iosefa e tusia ai o la igoa. E mamao le ala, ae o lo’o to Maria. Faimai le tala tamaiti e fetui a le o’o o Maria ma Iosefa i Peteleema, ae amata loa ona tigā le manava o Maria ua toetiiti fanau. Ona o ai lea o laua e su’e se fale se’i la malolo ai ma taoto ai Maria ua tigā lona manava. Na saili solo e Iosefa se fale talimalo, peitai ua tutumu ua leai se avanoa. Na maua le avanoa i se tasi o fale talimalo peitai o le fale o lo o momoe ai manu, ua faaigoaina o le fale povi.

Na talia ma le faafetai e Iosefa le avanoa ua la maua, ma o iina na fanau mai ai e Maria le faola o Iesu Keriso. Ioe tamaiti, e leai lava se isi o tatou na fanau mai i se fale o manu a? Toatele o tatou na fananau i le falema’i. O le fanau mai o Iesu i le fale o manu, o le faailoga lea o le sau o Iesu i le ala aupito sili ona mauualalo. O se ala e le aloa’ia e tagata, aua ua le tutusa le tagata ma le manu.

O le tatou tala lena tamaiti, Talofa ia Iesu ma le nofoaga na fanau mai ai. O se aoaoga mo tatou le fanau ia tatou iloa ona faamaualalo, e pei o le ala na afio mai Iesu. Aua tatou te manatu faamaualuga, aua o le ala lea e tutupu ai vevesi, ma femisaa’i ai tatou A ia tatou faamaualalo le isi i le isi ona maua lea e tatou le filemu. O le ala lea na afio mai ai Iesu i le lalolagi, ina ia sau e aumai le filemu i ona tagata.

**Uiga o Upu:**

- i) Gafa : feso’otaiga i le aiga/auga
- ii) Faufautane : fia faitoalua, faamau

**GALUEGA FAATINO: TALIGA FESILI.**

1. Aisea na o ai Iosefa ma Maria i Peteleema?  
Tali: (Tusigaigoa)
2. O ai e ana le poloaiga ia ia tusia uma igoa o le lalolagi?  
Tali: (Kaisara Aukuso)

3. O le a le uiga o le fanau mai o Iesu i le fale manu?

Tali: (Ala maulalo)

4. O le a sau meaalofo mo ou matua i lenei Kerisimasi?

Tali: (tatala le avanoa)

**PESE** : Alalaga ia, pepese fiafia.....

**A'OA'OGA:**

1. Ia maua le loto maulalo.
2. Ia maua le filemu o Iesu Keriso.
3. Na fio mai Iesu i se ala maulalo.

**UA FANAU IESU I LE FALE O MANU**

